

摘藻堂四庫全書薈要

集部

欽定四庫全書薈要

集部
明詩綜卷五

詳校官編修臣王天祿



欽定四庫全書薈要卷二萬四百七十八 集部

明詩綜卷五

翰林院檢討朱彝尊編

崧 五十首

崧字子高泰和人明初以人材舉授兵部職方

司郎中遷北平按察司副使坐事輸作京師尋

放還徵拜禮部侍郎署吏部尚書請老許之復

召為國子司業有槎翁集

宋景濂云子高天賦超逸之才加以稽古



之力雕肝琢髓宵吟夕詠而又得師友之資江
山之助五美云備詩於是乎大昌凌厲頓迅鼓
行無前緩急豐約隱顯出沒皆中繩尺劉仲
修云于高日課一詩多至千餘篇遭亂崎嶇轉
側二十餘年不為少折既貴澹然如布衣北平
去家五千里惟一僮侍側已復遣還晡時吏退
獨處一室據几吟詠夜分不休其年愈老思愈
壯詩愈工時豫章萬白大梁辛敬襄城楊士弘
秣陵周湏鄭大同皆以歌詩自雄子高與之馳
騁上下名聲相埒王元美云劉子高如雨中
素馨雖復爲然不作寒梅老樹風骨胡元瑞
云國初吳詩派昉高季迪起詩派昉劉伯溫闕
詩派昉林子羽嶺南詩派昉孫仲衍江右詩派
昉劉子高五家才力咸足雄據一方先驅當代
第格不甚高體不甚大耳
文王云子高虛澹不墮習氣

靜志居詩話于高句鏤字琢頗具苦心惜其體弱局於方程不能展拓於唐近大厯十子於宋類永嘉四靈於元最肖薩天錫

東方行

東方閃閃啼早鴉美人愁眠隔窻紗桐華樹下人來往
銀牀輓轡夢中響

姑蘇曲

姑蘇城頭烏夜啼姑蘇臺上風淒淒芙蓉露冷秋香死
美人夜泣雙蛾低銅龍咽寒更漏促手撥繁絃轉紅玉

鴛鴦飛去牒廊空猶唱吳宮舊時曲

過南川訪友同王子與羅子理分韻得滿字

連阜衍平皋深林閤虛館揚襟暢遐思散帙延清款溪
蓴花幕幕田黍實纂纂逕迴阡彌永水落澗初滿載欣
秋稼登矧愜人事罕欲往悲曠塗言歸理修曠

歲暮南歸留別蕭紳

旅寐不能旦披衣坐牀帷屋角曉色動鳥鳴已多時起
坐出庭際雲物正華滋殘雪未盡消羣山鬱參差即此

念故園焉得不懷思矧屬歲運周返駕固其宜理策望
前路揖君從此辭窮檐有穉子但訝歸來遲

辛丑正月二十二日述志

經年掩扉卧迹與城市遙誰為拔茹計乃以仕見招本
昧平生素敢勞中道要公檄臨我門戒命在夕朝九江
今雄州邁往方迢迢有母誰與居念之中心焦起揖謝
來客我何希市朝澹然一室內宴坐風寥寥

游三華山

龍門兩山負一水下迴繞蒼峽忽中開飛橋出林杪盤
盤石磴引羃羃松林窅危闌正西挂層閣復東繚樹暗
盡含雲花明忽聞鳥懸厓傍架棧鑿石潜通突早聞三
仙人棲化迹已杳常疑雲月上顏色靚清皎丹井舊時
深朝真亂來少荒壇翳霜兼虛館閤叢篠凝神觀衆妙
屏迹謝羣擾懷賢慨重憩振翼思遠矯佳境能娛人何
因致清醪

早行霧中過田家失道

我行烟霧中不復辨原陸
幽幽聞鷄犬隱隱見松竹
田家迷遠近阪路有崎曲
已覺瞻望勞誰云往來熟

舍弟往三壩嶺尋解子日夕未歸坐候林下

西林已雞棲北澗復蟲響
沈沈四山暝寥寥一星上
時危劇鍾情期逝勞紆想
悵立此溪陰欲休未能往

江干草居

江干愜幽屏草扉亦常開
晚塗斷歸人虛市見寒山
林木變冬候繁綠忽已殷
鳴鳥相因依孤雲時去還
唐虞

既云遠慨此時獨艱四體豈不勤我髮日已斑遨遊千載上偃仰一室間樂詠古人書庶幾無覲顏

和答蕭國錄八月十一夜對月有懷之作

林塘澹清華庭宇豁虛朗露井波澄輝風林葉交響高
言倡令德孤吟振遐想亭亭江上月肅肅雲鴈往美人
浩前期令節延遠望池魚既堪綸旨酒亦可醺永懷契
天游庶以會心賞宇宙本達觀如何較銖兩

題秋江待渡圖為蕭學士賦

小航衝風岸將及行人下馬沙頭立水濶雲深野渡間
天寒日暮歸心急人生行役安可休到江路盡還通舟
誰能裹足山中老不識風波一日愁

題余仲揚畫山水圖為余自安賦

金華仙人余仲揚筆墨蕭疎開老蒼昨看新圖湖上宅
烟霧白日生高堂層峰上蟠石皜皜絕島下瞰江茫茫
長松竝立各千丈間以灌木相低昂松下上人坐碧草
秋影忽落衣巾涼囊琴未發絃未奏已覺流水聲洋洋

赤城霞氣通鴈蕩巫峽雨色來瀟湘誰能千里坐致此
欲往久歎河無梁風塵漲天蔽吳楚六年悵望神慘傷
元援苦啼巖北樹白鴈不到江南鄉赭山焚林絕人迹
如此山水非尋常此圖本為自安寫亦感同姓悲殊方
幽軒素壁泉聲動對此令我心為狂何由捫蘿逐麋鹿
振衣直上雲中岡登臨一寫漂泊恨長嘯清風生八荒

題溪山春晚圖寄贈蕭翀

土山戴石石角傾偃樹雜出如幢旌青天微茫曉色動

雨氣合沓千峰晴野橋西邊有村路之子鳴鞘踏雲去
重巖花發似聞香隔水鶯啼不知處東南連年飛戰塵
如此山水何清新石田到處長荆棘豈有荷耒春耕人
我昨西遊登武姥手扶雲霞望仙府把酒忽逢東海生
醉卧溪南紫蘿雨紫蘿陰陰覆巖扉十日尋幽行未歸
雲峰流泉半空落六月飛雪霑人衣拂衣歸隱知何日
却對畫圖心若失不聞流水渡溪還時見浮雲向山出
懷哉桃花修竹林江海秋高煙霧深豈無耕釣在田野

誰識悠悠沮溺心

寄曾郁文短歌

澄江水向東流流向東昌江上頭我有故人在江上十
年不見增煩憂白沙水聲寒活活黃巖雲氣凝清秋豈
無沙棠柹吳女謳可載酒同遨遊狂風吹山波浪惡使
我不得回輕舟翩翩雲中雙飛燕銜書寄我頻留戀書
中展轉道深情但恨相思不相見春燕飛來秋復歸報
書不遣壯心違碧蘭紫蕙何由采即恐蕭條霜露稀

題曾郁文所藏山水小景

隔溪望見林間屋沙渚陰陰俯羣木溪流合處一橋孤
春雨來時萬山綠江南此景真可憐米家筆意誰能傳
却憶故廬珠浦上短籬長繫釣魚船

題山水畫軸

瀑布雙垂下屏風九疊張波光混彭蠡山勢似潯陽松
塢棲茅屋楓林帶石梁扁舟如可具吾意在滄浪

張氏溪亭雜興 二首

草閣經秋靜柴扉近水開霜林收橘柚風磴坐莓苔釣
艇寒初放樵歌晚獨回城南車馬地欲往更徘徊
寒霧依山斂晴沙與岸頽林塘無路入窻戶有時開野
客鈔書去鄰翁送酒來幽期在蘿薜莫遣暮鐘催

題陽靈洞

仙宇何年闢靈泉盡日聞石門通別殿木棧倚高雲鸞
鳳時來下獼猴近作羣春風城郭暮煙霧正紛紛

題彭氏背郭茅堂圖

日薄金華嶺雲深白石塘茅茨元背郭水竹自成鄉
圖畫看逾好登臨興不忘門前雙杏樹葉葉是秋霜

過龍灣五王閣訪友人不遇

野橋秋水落江閣暝煙微白日又欲午高人猶未歸
青林依石墻虛館淨柴扉坐久思題字翻憐柿葉稀

再懷伯兄子中時有同客興國者從間道先歸兄
以道阻後期不果

貧賤輕離別艱危昧死生獨違同里伴仍阻異鄉程
愛

想深山懋愁聞間道行幾時秋樹下慰此淚縱橫

玉華山

翠巘千峰合丹厓一逕通樓臺上雲氣草木動天風野
曠行人外江平落鴈中傷心俯城郭煙雨正溟濛

題李志謙書舍

溫家亭子三江口坐對東風兔子寮錦石白沙寒歷歷
碧雲紅樹晚蕭蕭簾虛易覺天光切衣潤常疑霧氣飄
賴有石門支遁在題詩長日出溪橋

舟次樵墩憶故人鄭同夫

浦口維舟日欲晡
柳村桑塢帶紫紆
獨尋古道黃埃滿
忽憶故人秋興孤
螺蚌儘供溪女拾
雞豚偏稱野人呼
西山隔水清如玉
誰與題詩送酒壺

奉同曠伯遠周叔用徐仲孺登秋屏閣是日聞淮
郡有警風沙黯然賦呈萬德躬孫伯虞諸君子

古剎蕭條隱石根
荒城高下帶沙墩
斷雲南鴈日初出
曠野北風天正昏
羽檄屢傳淮甸急
龍艘猶滯海門屯

湖山不盡登臨興回首鄉園獨愴魂

入城

江水依然抱石磯獨行空感舊游非
晚山當戶日初落秋草滿城人未歸
田鼠引羣穿井出山鷄求食傍簷飛
向來車馬東門路忽憶朋游淚滿衣

漫興

山下碧溪渾欲平溪邊春事總關情
定巢新燕忽雙過隔水雛鶯時一鳴
凍入秧畦愁近雪光涵風浦愛新晴

南園草綠無人到應是滿林春筍生

客情

清明已過寒雨稀客情物色共依微
庭前幽草忽如積江上落花渾欲飛
風雲慘澹隨長戟塵土蕭條上短衣
雲亭江上麥田熟昨夜月明還夢歸

將歸南平發舟戲賦

梅演山前聞鴈來珠湖渡口放船回
晚雲出嶺作疎雨秋水滿江生綠苔
故里風煙頻入夢中年世事獨興哀

飄搖莫戀詩千首
斷送深憑酒一杯

秋日承廬陵曲山蕭壽春過林居臨別賦贈

秋露滿園桑葉飛
遠煩江上問柴扉
青山古道獨行晚
白髮故人相見稀
細雨高原禾黍熟
斜陽疎樹橘橙肥
殘年甚欲留君住
何事驅駒只賦歸

早春燕城懷古

二首

金水河枯禁苑荒
東風吹雨入宮牆
樹頭槐子乾未落
沙際草芽青已黃
北口晚陰猶有雪
薊門春早漸無霜

城樓隱映山如戟
笳鼓蕭蕭送夕陽

宮樓粉暗女垣欹
禁苑塵飛輦路移
花外斷橋支鼎鬲
草間壞壁綴罍罍
酒坊當戶懸荷葉
兵壘緣渠插柳枝
不見當年歌舞地
空餘松柏鎖荒祠

陶皮石室

自注即今北巖古陶皮二仙修鍊之所
天將雨則巖竇有泉出焉禱者嘗以為

候舊名觀音

巖今正之

北岩極豁豁三面環絕壁
聞有山雨來石泉先暗滴

峭壁蘭

巖石下陰陰倚蘭綠如翦花發人不知秋香入苔蘚

題李唐牧牛圖

二首

天寒放牛遲野曠風獵獵獨來長林下吹火燒山葉
日夕山氣昏獨歸愁路遠猶戀草青青遲回下長阪

江上

沙觜微波漾綠蘋山頭落日駐紅輪依稀燈火楓林鼓
岸上人家賽水神

步月

乘涼步月過西鄰
露草霏微濕葛巾
一逕竹陰無犬吠
飛螢來往暗隨人

八月十一日自水南渡江道金華過北巖訪蕭鵬
舉是日雲陰掩冉不見日色道中賦絕句

八月棠梨露葉紅
荒陂古木湛青銅
秋風依舊巖前路
高下寒山落日中

正月十九日

金魚洲下放船開
華石潭邊看雨來
愛殺南天雙白鷺

青山盡處却飛回

題枯木竹石 二首

木葉欲脫天雨霜竹枝乍低風已涼
三湘落日流波白行子繫船思故鄉

平沙竹樹晚毵毵楚客維舟近峽南
忽憶微雲將雨過滿林秋色照江潭

題超上人墨菊

露香秋色淺深中青蕊黃花自一叢
最憶南園微雨過

短籬扶杖看西風

蒼石峽中見道人菴居隔水山花盛開

蒼石峽中花藥欄舊時草屋傍巖安道人去後松橋斷
縱有花開隔水看

題三岡寺

石橋流水到人家紫殿春陰閣岸沙啼鳥數聲山雨歇
門前落盡白桐花

寒夜

馬齒枯茲寒夜長風如箭鏃射陰房不知門外三更雪
誤起開門看月光

送別叔銘出順承門

送客出城秋已涼太行南上楚天長順承門外斜陽裡
蕎麥花開似故鄉

望漢獻王陵

單家橋下雪橫冰草樹連雲掠凍鷹漢業已荒河水在
行人遙指獻王陵

高唐州道中

北風吹沙官道長
兩旁楊柳間榆桑
何時走馬重來此
要看清陰六月涼

周

湏 三首

湏字伯寧江寧人明初任饒州長史陞湖廣都
事旋擢刑部尚書降惠州經歷

周吉父云伯寧
望九華詩云巖

回氣如蟠峰去
勢猶引佳句也

始發建業登龍江山祠感懷有作

去國思舊遊尋山發幽眺遙凌天門石恍對臨海嶠神
關列雄鎮危堞抱遺廟秋陰散氛翳炎景扇餘燎天水
遠自空雲霞近爭耀客行始多感世事紛難料同俗豈
素懷趨時固殊調既為達士恥復被逐臣誚行矣庶無
欺忠信將可劭

舟中望九華山

貞履無素期勞生意恒窘誰云戒戎路曾是返初隱水
宿淹長晷山行阻修畛縹緲對雄標嶢岈發奇蘊巖回

氣如噴峰去勢猶引刻削冠青蓮雕鏤矗丹筍嵒霞上
斑剝石乳下礚礚山鬼從文狸淵靈閔元蜃睠言志藜
藿未遂采芝茵卽事情已悲懷賁迹俱泯潛吳媿梅福
去汶羞閔損人德險未夷天道明可準皋蘭豈徒歌巖
桂芳未隕歲暮山中人寤歌

一作
結言候歸軫

賽小姑廟

育秀凌華嵩標奇奠淮楚陽關啟神關陰沈開水府林
林聚商舳淵淵聞戍鼓陳瑟會安歌傳芭紛代舞椒漿

既芬潔桂擢方容與日暮懷歸情含涕望修渚

黃肅

五首

肅字子邕江西新城人元季官禮部主事自北
平來見命仍故官陞侍郎已降郎中復陞工部
侍郎任尚書未幾出參政廣西坐黨禍死有醉

夢稟

王于充云子邕詩簡易平質一
本漢魏絕去近代聲律之習

詩話尚書匣鏡一為當是懷故主遠在沙漠而
作其云夫子新好合不能思故家則刺同時佐
命之臣也

短歌行

來日苦少去日苦多人生不滿百痛當奈何不如沽美酒與君長笑歌峻坂無停車急川無停波人生不滿百當復奈何來日苦少去日苦多

詠懷 三首

少壯好游覽不知中道憂方茲懷故土眷此成淹留
闕蔽朝暉玄雲陰以浮徘徊當永夕嫵婉將焉逮
棲鳥翔不息鳴蟲亦啾啾人生無定止卒歲何能休

流水日夜流厚土何不盈人生自不已四運迭相承達
士識物化昧者徒營營蕩蕩晨風來悠悠天宇清會當
撥塵務聊復從吾生追呼心所歡置酒坐中庭忘言勿
復辨觴盡還復傾

匣鏡三十年塵暗不復治停餐且不寐所思知為誰蕩
子不復返眇在天一涯綻衣終當組道遠何能持明明
天邊月三五入中閨念與子歡愛不得同光輝寤言相
與共既覺將何依

客中書懷

竹裏山鷄啼未休江南二月景如秋
半簾花雨寒侵袂一片江雲晚傍樓
亂世青春如過夢少年華髮忽盈頭
故園動是經年別滿眼干戈添客愁

牛諒

三首

諒字士良東平人流寓吳興以秀才舉除翰林
典簿使安南還擢工部員外郎歷禮部尚書降
主事尋復任免有尚友齋集

郁伯承云弁州別集以公從主事為

尚書收入趙遷之例予按科試考有掌卷官工部員外郎牛諒又宋學士慶成宴詩序有工部侍郎牛諒是由員外侍郎而至尚書亦循序而遷也公優於大學嘗與唐應奉肅有丁未九月聯句蓋國初才士鄭莊畦云實錄洪武七年十二月癸丑罷禮部尚書牛諒官諒初為禮部尚書以怠職降為本部主事未幾復為尚書至是又以不任職罷是諒為工部員外侍郎皆在洪武七年禮部尚書之前弇州別集謂公從主事為尚書收入趙遷之例似與實錄及科試考慶成宴詩序不合

詩話尚書流寓吳興時過樞李與鮑恂仲孚丘民克莊張是翔尚王綸昌言聞人麟彦昭曹睿新民徐一夔大章允存以仁反呂安坦來志道周棐常真釋智寬等集郭西景德寺攜酒賦詩

其在南京則與唐肅處敬林公慶孟善陳世昌
彥博徐一夔大章張翼翔南朱升允升會飲聯
句及同張以寧志道使安南志道賦長句以贈
有云更喜清詩懋逢暮蓋當日風雅之林每屈
一指不徒以功名顯也又在元
時中甲午大魁亦見志道詩句

西郭憩景德寺分韻

靈湫閔白龍古殿敞金粟僧歸林下定雲傍巖端宿伊
余陪勝引於此避炎酷息陰悟道性習靜外榮辱坐石
飛清觴每歎白日速別去將何如留詩滿青竹

紅梅

隴頭人未來江南春幾許惆悵玉簫聲吹落胭脂雨

畫梅

梨花雲底路參差折得春風玉一枝南雪未消江月曉
欲從何處寄相思

朱夢炎一首

夢炎字仲雅進賢人元進士入明為國子博士
遷翰林修撰出為浙江按察司經歷轉山西行
省員外郎入為禮部員外郎擢本部侍郎陞尚

書

錢塘西湖

萬戶煙消一鏡空
水光山色畫圖中
青樓燕子家家雨
錦浪桃花岸岸風
櫂轉舞衣凝暮紫
簾開歌扇露春紅
蘇公堤上垂楊柳
尚想重來試玉驄

楊訓文 二首

訓文字克明
潼川人元淮海書院山長
遇亂居江都
明初徵為起居注
兩遷左司郎中
丙午年

自太常卿知湖州移知汀州歷禮部尚書改戶部出為河南行省參知政事卒

詩話元詩華者易流於穢貫酸齋輩是也清者每失之弱薩天錫等是也明初若劉子高蘇平仲楊克明其源皆出於天錫賢羸之恨諸公不免

贈友

與子分攜後星霜二十年重逢驚老大惜別更留連
花落春江雨鵑啼綠樹煙幽懷浩難寫愁墮酒尊前

寄石仲文

故人別後復如何不寄新詩到薜蘿賈誼書成何日上
張衡愁比向時多江城木落霜連地澤國天寒水不波
重約明年秋八月紫薇花底共鳴珂

滕

毅 三首

毅字仲弘鎮江人以儒士徵授起居注擢吏部
尚書出參政江西

詩話尚書詩不多傳亦具風骨秋
興二詩仿彿宋文恪過故宮之作

秭歸即楚王臺舊基為新城

春風夔子國落日楚王臺江遶西陵下雲從上峽來壯
遊今已遂幽思獨難裁關塞猶戎馬吟邊首重回

次韻黃秀才秋興

二首

西風如水灑絺衣無數南來候鴈飛朔漠地寒收王氣
岷峩秋盡斂餘暉三泉忽報金棺葬萬國同瞻玉璽歸
相見不須談往事百年耆舊眼中稀

虎戰龍爭二十秋江波日夜自東流道旁無語王孫泣
天際含嚬帝子愁苜蓿風煙空壁壘蒹葭霜露滿汀洲

古來維有西山月永夜依依照白頭

錢用壬

一首

用壬字成夫廣德人元翰林國史院編修出為江浙行省左右司員外郎既而參平章張士信軍事於淮安陞參政歸附後授按察副使歷禮部尚書洪武元年十二月告老賜居湖州

題米敷文煙巒曉景

江上亂峰生暮煙隔江遙望水雲連西風戰艦今無數

不見米家書畫船

李質一首

質字文彬德慶人元末以府掾聚兵二萬保障
封川等四郡者十五年全城歸附授中書斷事
遷大都督府洪武五年任刑部尚書出為浙江
參政終靖江王相有樵雲集

玉臺驛亭子

春去臺空迹已陳危亭傑出澗之濱清溪繞屋可濯足

好鳥隔江如喚人
明月委波金潋灩
青山帶雪玉嶙峋
桃花流水非人世
或有漁郎來問津

吳雲一首

雲字友雲宜興人
洪武初授弘文館校書郎歷
刑部尚書參政湖廣奉詔招諭雲南死之

詩話尚書送李民瞻一律體格極似高季迪送
沈左司詩而聲色不同未免近於土木形骸矣
錄之以證知
言之君子

送李民瞻侍郎宣諭陝西

侍郎將命出金鑾道路傳呼遠近歡關內官曹迎使節
秦中父老識衣冠雲開太華三峰秀水遶黃河九曲寒
寄語渭川千畝竹西風還解報平安

張籌一首

籌字惟中無錫人以薦授翰林應奉洪武八年

任禮部尚書降員外郎

徐子元云惟中剛健之氣未能全融而金石節

然足洗俗樂之耳

朱中舍惠麓秋晴圖

湖上羣山卧九龍泉頭一客坐雙松定知別去還相憶
夢入秋雲第幾重

吳琳一首

琳字朝錫黃岡人召為博士歷浙江按察僉事
入充起居注洪武三年吏部尚書出知黃州以
老致仕

開化道中

重岡狹路倦登臨喜見溪流華步深楊柳樹邊舟小小

海棠花上雨沈沈一春王事過三月千里家書繫寸心
無補盛時縻好爵不才端合老雲林

嚴震直 二首

震直初名子敏字震直因御稱其字乃互易焉
烏程人明初由糧長授河南布政司參議累官

工部尚書致仕永樂初召令宣諭山西卒於澤

州有遣興集

朱平涵云嚴公遇建文帝召金事
見吾學編名卿續紀二書世所尊

信無有易者然文皇入京在壬午六月而嚴公
之卒即在是年九月是時但知建文帝焚死後

數年漸有傳在西南徵者於是使胡尚書訪張
選通鄭太監賞賜西域此時嚴公捐館已久矣
今其子孫據二書請於所司立
祠立碑不知前後迴不相及也

詩話尚書由運糧萬石長舉為布政司叅議未
之官留署通政司事歷工部尚書洪武三十一
年春致仕建文元年已卯復以年老辭不與事
帝念其任事久留住京師考遺興集中有燕集
賜第之葵心堂詩乃是年三月十五日事分韻
者為董學士倫茹尚書瑋高太常遜志任尚書
亨泰程都御史本立李尚書至剛鄭庶子濟黃
侍郎福張尚書統高經歷德賜凡十有一人太
常詩云偉哉尚書公致政鳴珂里賜第最幽敞
迴出京塵裏庶子詩云尚書遂休致賜第居京
洛侍郎詩云司空居廟堂憂國髯如絲挂冠神
武門賜第留京師歷歷可證而續藏書謂尚書

歸老在里長陵以兩馬夾袋舁至京致身錄又稱靖難兵起時督餉山東皆妄也載攷文皇帝實錄壬午七月二十三日詔云朕居藩邸凡百姓艱苦靡不知之數年來兵興北方之民疲勞尤甚朕所以舉義者為宗社生民計今宗社既安而北方之民未安朕夙夜不安乃命前工部尚書嚴震直戶部致仕尚書王純應天府尹薛正言等分往山西山東陝西等布政司巡視民瘼何弊當革何利當建連具奏來尚書受詔往山西是秋九月十一日病卒於澤州公廨合之忠誠伯茹璫所撰嚴公神道碑無異初不聞奉長陵密詔往雲南訪建文帝也吾學編遜國表忠紀等書不知何所據信吞金為實列尚書為後死忠臣之首萬厯十九年巡按御史黃鍾疏請建祠榜曰旌忠列在祀典越數十年其裔孫祇字文昭作祠祀辨大指謂吾祖功業炳耀史

毋何藉吞金一死以罔天下後世黃公欲顯吾
祖適足以誣吾祖也噫文昭不欲誣其祖可謂
賢子
孫矣

棲霞真境

棲霞有真境遠在桂林間春風洞中瑤草綠桃花滿樹
春斑斑羣峰拔地幾千尺上有樓臺耀金碧興來直欲
一登臨王事有程留不得

永州舟中

瀟湘二水會零陵灘響惟聞浪作聲兩岸青山明月夜

畫船行過永州城

朱

同

一首

同字大同休寧人自號紫陽山樵洪武中以人
材舉為東宮官進禮部侍郎尋被誣得罪有覆

甌集

題畫

紫陌紅塵沒馬頭人來人去幾時休誰家有酒身無事
長對青山不下樓

丘民一首

民字克莊揚州人徙居嘉興洪武初為松江學
官後至禮部侍郎

送友人至杭

又隨南鴈度錢唐不道他鄉是故鄉江上秋風蓴菜美
山中春雨石田荒杜陵老去寧忘蜀江總歸來不是梁
欲采芙蓉贈君去錦雲零落倍淒涼

秦約四首

約字文仲鹽城人徙居崑山仕元為崇德教授
洪武初召拜禮部侍郎以親老辭歸再徵為溧
陽教諭有樵海集

江之水寄楊鐵厓

江之水流瀾瀾蕩漾雙鳧舟涉江采蘭芷蘭芷青青露
如洗下有一雙魴與鯉美人美人胡不來相思日暮江
風起

雜興

玄冬十月交蟋蟀近我牀傷彼苔之華含英委清霜文
夫四方志千金戒垂堂壯日不奮迅老矣徒慨慷

紀夢簡陳簡討二首

宮車輓輓過神皋五色雲中望赭袍野膳不嫌涼餅滑

小奴花下翦春蒿

查夏重云是詩似指
庚申君北狩時事

吳蠶入繭染春紅繅盡柔絲未論功若得君王迴一顧
不辭白髮上陽宮

韓宜可 一首

宜可字伯時會稽人洪武初徵拜御史出為山西布政謫雲南後起為左副都御史

詩話伯時詩見滄海遺珠句如松迷鶴徑渾無
路花暗簫聲不見人青天有月來今夜白髮無
家幾度秋芳草東風沙上馬
青山遲日柳邊鶯均有思致

五華山圖

五華之山山上頭俯視東海如浮漚豈無四萬八千丈
亦有五城十二樓翠葉影落中天曉玉柱光含大地秋
何日相從陪杖屨西風林外一長謳

蘇伯衡 三首

伯衡字平仲金華人明初仕為國子學正擢翰

林院編修宋濂以翰林承旨致仕薦以自代召

至固辭賜文綺遣歸起教授處州以表箋忤旨

坐罪卒于獄有平仲集

劉伯溫云平仲詩文辭達而義粹識不凡而意

不詭蓋明於理而昌於氣也

徐子元

云平仲豐腴太牢之味與藜藿自別

詩話元時進賀表文觸忌諱者凡一百六十七
字著之典章使人不敢犯其法良善建明孝陵恩
威不測每因文字少不當意輒罪其臣若蘇平
仲徐大章輩是也當日有事園丘惡祝冊有子

我字將譴撰文者桂正字彥良言於帝曰予小子履湯用于郊我將我享武歌于廟以古率今未足深譴帝怒乃釋可謂善於悟主矣惜未有為平仲調解者竟瘐死於獄悲夫一百六十七字者極盡歸化亡播晏徂哀奄昧駕遐仙死病苦沒泯滅凶禍傾頽毀偃仆壞破晦刑傷孤墜隳服布考短夭折災困危亂暴虐昏迷愚老邁改替收廢寢殺絕忌憂切患哀囚枉棄喪戾空陷厄歟忽除埽損缺落典憲法奔崩摧殄頌墓槁出祭奠饗享鬼狂藏怪漸愁夢幻弊疾遷塵亢蒙隔離去辭追考板蕩荒古迭師剝革朕違尸叛散慘怨尅反逆害戕殘偏枯眇靈幽沈埋挽升退換移暗了休罷覆弔斷收誅厭諱恤罪辜愆土別逝泉陵此延祐元年十一月取定擬至三年八月寬其禁矣其字樣雖難悉避然亦玉堂視草者所宜知也

送陳思可主簿赴進賢任

一別十五年候忽若昏旦相逢京城中幸脫戎馬亂宦
遊我何成鬢髮子已換留連一尊酒寂寞四門館剪燭
聽寒雨話舊過夜半居然消百憂莞爾成一粲維子才
且賢文采甚煥爛起從有道徵國光方縱觀謂宜真館
閣鴻猷藉宣贊如何奉明命鉤考親吏案黎庶乃邦本
疾痛資抑按要將遠猶敷可以小邑翫心懷簡書畏跡
逐萍梗散席挂遇順風潮生失遠岸昨夕簪云盍今朝

袂還判後會復何時臨岐重嗟歎

周伯寧春晴江岫圖

尚書襟懷絕瀟灑揮毫往往凌董馬平生一筆頗自珍
數尺新圖為君寫齊山遙接吳山青碧波萬頃孤帆征
東風綠遍汀洲草總是岐亭離別情一向江南一江北
離情浩蕩嗟何極正如江上之碧波縱有并刀那翦得
當時已足令心愁如今況復隔羅浮掩圖却上高臺望
但見遠海連天流暮歸朝出誰與侶蜃霧蠻煙結悽楚

木棉花落鷓鴣飛
苦竹叢深鷓鴣語

絕句

落葉滿衡門
蕭蕭風雨夕
一燈溪上明
何處獨歸客

唐

肅

六首

肅字處敬
會稽人
元末官嘉興儒學正
洪武初

召修禮樂書
擢應奉翰林文字
兼國史院編修

以疾失朝
罷歸里
謫佃濠卒
有丹崖集

歲叔能云處敬

詩文澹而華實而麗直而不倨簡而不密
平仲云應奉律詩步驟盛唐
顧玄言云翰林

思廟

清辭

詩話處敬文極為危太僕宋景濂戴叔能申屠
子迪所許詩與謝僉事原功齊名稱會稽二肅
其為學正也盡挈其家居攜李徐幼文送以詩
云踏出三江外程淹一日間高季迪詩云舟重
全家去詩多一路題處敬亦有留別詩存丹崖
集中當元之季浙西歲有詩社而濮市濮仲溫
豐於貲集一時名士為聚粹文會以春遊者五
百人請楊廉夫評其優劣於是紀風土者目為
樂如及楊完者亂州無完郭然終同知思恭德
謙猶招羣彦集南湖與會分韻者一十有四人
越二年曹教授審新民復集諸公於景德寺亦
一十有四人足時聞人麟彦昭葉廣居居仲金
綱子尚諸葉汪氏劉堪子與咸有詩名吳鎮仲
圭居魏塘曰瓊廷琚居千金圩鮑恂仲圭居郎

城之西溪鄧遵子路居商陳村四方避地者溫
州陳秀民庶于居竹鄰巷閩人卓成大器之居
璧川江陰孫作大雅居南湖范山顧德輝仲瑛
居合溪天台徐一夔大章居白苧里會稽江漢
朝宗居濮院桐廬姚桐壽樂年居海鹽之我溪
而河南高遜志士敏東平牛諒士良江都丘民
克莊錢唐陳世昌彥博建德張翼翔南皆來僑
居四明周棐以陸宣公書院山長留居蔡林日
以入酒唱詞詩成輒鏤板鏡壁間者傳為勝事
今也流風遺俗未存者錄處敬詩因附及之
欲尋舊蹟不勝海
東岸谷之感也

銅井迎送龍辭二首

我鼓兮吹簫迎我龍兮山椒龍之都兮何所泉淵淵兮

石為戶叩龍車兮乞靈龍不出兮我心若醒我心若醒
兮龍寧勿聆

我叩龍兮龍卹風旋波兮龍出龍之出兮福予變旱熯
兮為澍龍為澍兮我弗饑返山椒兮雲旗風泠然兮龍

歸

題張孟兼所注謝翱西臺慟哭記後

有序

謝翱字皋羽文丞相館客丞相既薨皋羽哭之
於子陵釣臺作慟哭記今金華張子為之解云

宮中六更初罷鼓
藍田洗玉沈屋浦
廬陵忠肝一斗血
去作燕然山下土
桐江水落秋日頽
有客歌上嚴光臺
石根敲斷鐵如意
萬里北魂招不來
西風又涸灤河水
故老寥寥知有幾
珍重睢陽季葉孫
箋簡能裨兩朝史

過清流關呈同行者

關在滁州即宋太祖以周師擒南唐將皇甫暉姚鳳之地

前月與君南入關
五更月出山霧寒
行人畏露復畏虎
十十五五同躋攀
今日與君仍北去
赤日黃塵汗如雨
息肩共憩石浮圖
欲喚天風便高舉
當時宋祖百萬兵

擒暉戮鳳關險平百年戰爭幾人守空餘蔓草啼鼯鼯
關南遙遙白雲遠關北茫茫盡平坂回頭野燒起荒田
驅車度關愁日晚

題趙仲庸所畫滾馬圖

匹馬滾塵誰所寫天水王孫最文雅王孫系宋不系唐
那識唐人與唐馬左輔白沙白于雪四十萬頭名各別
廐中此馬帝常騎一色紫霞名叱撥奚官似隸王毛仲
左手執刷右持鞚沙平草暖不被鞍芻豆飽來筋力縱

翻身倒豎踏鐵蹄
霧尾風駭亂不齊
元是滇池赤龍種
猶思躍浪涌春泥
太平無事征戰少
青絲絡頭可終老
不似交河赴敵時
夜蹴層冰僵欲倒

抵瓜州

春雨春潮撼客懷
舟中十日九陰霾
江名天塹元通蜀
地入瓜洲始接淮
我笑銀杯能羽化
君看寶劍或塵埋
明朝又過揚州去
無復瓊花舊觀牌

韓守益

一首

守益字仲修石首人明初以儒士攝教宜都擢
廣西按察僉事入為河南道御史改春坊中允
有樗壽稟

詩話中允無詩名七言如幽禽曉聚岸花動錦
鯉春肥溪水溫柳葉雨晴鸚鵡語木棉風暖鷓
鴒飛隔簾花影散棠隸何處鳥聲啼栗留具有風致

過九江

夷險休渝節勤勞莫問家暮船維柳樹春水泛桃花廬
阜依霄漢江州對渚沙多情白司馬曾此賦琵琶

申屠衡一首

衡字仲權大梁人徙居長洲洪武三年徵至京
草諭蜀文稱旨授翰林院修撰謫徙濠有叩角
集

宮詞

青瑣春間漏點稀
博山香暖翠煙微
隔簾誰撼金鈴響
知是花間燕子歸

江漢一首

漢字朝宗會稽人徙居嘉興洪武初以文學徵仕翰林院編修

題破窓風雨圖

若有人兮青雲衣佩玉玦兮光陸離爰處兮爰居左琴
劍兮右圖書輕富貴兮浮雲保厥美兮天真山房兮寥
落天冥冥兮雲漠漠雨瀟瀟兮風夜作心耿耿兮不寐
紛遑遑兮求索彼薄夫兮貪婪惟聲色兮是耽文繡兮
膏梁蓀何為兮懷慙秋蘭兮可紉吾所思兮古人寒檠

兮雪案甘與君兮相親

趙

俶一首

俶字本初紹興人元鄉貢進士明初官翰林待

制

續蘭亭會補參軍孔盛詩

暄風播曠宇欣懷託陽春盥祓寄幽暢虛襟遺世塵
擷芳遵丘阿接杯沿澗濱詠歸何逍遙遐哉仰斯人

詩話詩不見佳取其有晉人遺韻

桂彥良 一首

彥良名德稱以字行慈溪人洪武初待詔公車以白衣賜宴除太子正字尋為晉府右傅改長

史追贈編修謚敬裕

烏繼善云先生詩文在鄉里曰清節集在京師曰清

溪集春和詠言為王傅時曰山西集為長史時曰桂笏集還鄉後曰老拙集又有和陶詩中都紀行皆不在集中其字句雖刻削點綴自令人稱道不已

詩話長史以德望重韻語非其所長然如巴園五月收丹橘丙穴三春饌白魚亦小有風致吳江史明古為作傳稱孝陵嘗咏科斗云池上看科斗分明古篆文命長史續之應聲曰惟因藏

水底秦火不能
焚可稱敏絕

和陶

我生雖阨窮牆屋亦苟完集芳被荷衣隱居思鶡冠素
無怨懟心安有憂戚顏明月照溪堂清風隱柴關螺杯
偶獨酌焦尾時一彈悠悠五噫歌遠懷梁伯鸞庭前種
梧竹清秋共高寒

王 鏞一首

鏞嘉興人洪武庚戌舉人翰林院編修

詩話予年十七避兵練浦歲己丑崔符四起乃
移家梅會里里在大彭嘉會二都之間市名王
店或曰石晉時鎮遏使達居此故名或曰宋尚
書居正之宅或曰元學士杲家於是或曰元學
正綸也傳聞各異己亥十月訪蔣布衣之翹於
射襄城蔣語余曰子知王店之所由名乎洪武
中孝廉鏞及弟鈞之所居也因出所輯稿李詩
乘則二王詩俱在焉并出二王合刊詩稿舊本
共一冊燈下讀未竟客至轟飲而罷甲辰四月
再過之不值又數年而蔣逝無子遺書盡失可
歎也後見水竹居詩一卷中載二王題咏各一
首因巫錄之水竹居者處士朱克恭之宅距語
兒鄉東六十里地曰澄林當時郡人馬盛為記
貝瓊為志題詩者二王而外有金天藻陳麟陳
熊陳振孫詢熊詩云到門碧色帶初雨滿地綠
陰遮暮天振詩云玉簫吹徹天如水釣艇歸來

月滿村釣詩云候門童子低於鶴留客軒窗小
似船熊為清江弟子見清江游及山記詢府志
有二人一分宜丞一汀州知府餘皆不得而詳
矣梅曾一作梅滙水曰梅溪鏤詩所云吾家舊
在梅溪上是也梁孟敬石門集有題嘉興王氏
梅花莊詩未審即是二王所居否因錄鏤詩附
志於此

水竹居為朱克恭賦

碧水澄潭自作洲琅玕多種屋東頭旋燒新筍安茶竈
時斫嘉魚踞釣舟客至罷邀明月飲人間何必五湖遊
吾家舊在梅溪上遙憶清風度早秋

劉

紹五首

紹字子憲後以字行建昌新城人

明音類選洪作吉安人

武中官翰林應奉詩載元音遺響

詩話子憲與盱江胡布子申張達季亢為郡人
張烈光啟胡福元澤類編其詩號元音遺響度
其初三人皆不仕于明者而府志載紹於洪武
中官翰林應奉文字後以國子助教致仕則不
得謂之元音矣登道山亭五言遺響不錄考子
申詩序云僕與子憲為世姻家曩俱客閩師不
克所志斯蓋客閩時作子申又為紹作山居十
詠其三曰仙臺山則在新城縣西南三十里而
元澤編子憲詩題曰黎川劉紹然則紹非吉安人審矣

秋懷三首

緬俗結紆軫易初吾弗為臨流采香薄日與佳人期舉
世厭芳草薰猶以同施撫襟悵予懷策駕臨海涯聞有
魯連子千金棄如遺高情儻可起攜手斯與歸

大化日旋運曦娥去悠悠俛仰宇宙間身命誰能留迷
復肯在已不耕寧有秋鷄鳴起為善思與大德儔朝露
竟幾何悵然日增憂

陰陽鼓橐籥日月如轉丸宵神化運誰能測其端春

賜美萬物秋露淒以寒乘時變榮悴天道終可言

邯鄲

訪古墓英俠壯游過邯鄲連山飛翠來馬首如揚瀾貫
酒呼美人浩歌弔平原憶昔致多士儲才濟時艱賓筵
粲珠璣簫鼓清夜闌蹇我匪脫穎懷賢邈難攀干戈浩
縱橫長路方漫漫感激詎有已登車推肺肝

登道山亭

名藩跨炎服崇阜極幽爽亭臺納元氣磅礴俯深廣我

來屬初霽心與孤雲往蕭颯海樹秋如聞暮潮響摩挲
石闌古揮霍霄漢上大有本空虛河山一溟漲淒涼乘
槎意迢遞紫霞想濁世誰復然臨風默惆悵

林公慶一首

公

松江新舊府志失書公字

慶字孟善處州人明初官翰林

出為松江知府

詩話孟善守松江築三高士于于山東麓見魏
文靖集而顧東江作府志官籍民閥皆闕焉不
詳後來者更
不足責矣

長沙

岳麓道林何處是
郡人遙指水西村
儒官佛寺俱無迹
竹樹如麻暮雨昏

明詩綜卷五

總校官庶吉士臣張能照

校對官編修臣閔懋大

謄錄監生臣吳魯田

欽定四庫全書薈要

集部

明詩綜卷六

七

詳校官編修

臣

王天祿



欽定四庫全書薈要卷二萬四百七十九

集部

明詩綜卷六

翰林院檢討朱彝尊編

訪一首

訪字子常休寧人隱居東山元季輔元帥汪同
起兵保鄉井授江南行樞密院都事丙申內附
洪武二年召修元史書成不願仕還有東山集

汪仲魯云子常詩因感發而形之詠歌雖不專
乎是然長篇短哦亦不一字苟為也 詹烜云

先生詩五言初學六朝後改習建安諸子及老杜近體則學唐人

靜志居詩話東山環谷二先生俱以經學重尤研精春秋環谷守康侯之說東山學於黃楚望首闢夏時冠周月之非不相雷同故陳敬初贈詩云君之博洽漢馬融春秋三傳以例通百源雖異委則同二先生於吟詠均非所長趙差勝汪趙集歲久淪闕其裔孫吉士視推揚州鏤版以傳

與葉宗茂遊山村

村北村南春事幽故人亂後得相求
倉皇屢作經年別邂逅能無一日留
丁令歸時空有恨虞卿窮久不須愁

卜居共愛清溪好先向沙邊具小舟

汪克寬一首

克寬字德輔一字仲裕祁門人隱居環谷教授
洪武初召修元史書成固辭不仕有環谷集

孫豹

人云環谷七言古詩
在長吉子瞻之間

哀鄒山處士

大化無私兮猶埏埴之陶鈞
跖何命之長兮回何命之
屯嗟哉斯人兮撲以醇夫何災疾兮四體不仁
越星周

而弗瘳兮重子姓之悲辛丹青彷彿兮迥然笑顰魂胡
不歸兮鄒山垠

陳基 二十一首

基字敬初臨海人仕元為經筵檢討歸值用兵
開行樞密府起為都事轉江浙行省郎中參張
士信軍事尋參太尉府軍事遷學士院學士吳
平召修元史賜金而還有夷白齋稿

顧仲瑛云
敬初古文

詩章同輩雖極
力追之不能及

詩話敬初家臨海丹丘之麓其在吳結小丹丘
戴叔能為作記其詩亦叔能所編顧仲瑛輯前
後交友詩為玉山雅集柯敬仲以下即次以敬
初詩謂同輩極力追之不及蓋當時之月旦然
矣

山高寄陸玄素

謂山高兮其上有天謂地厚兮其下有泉天不可升兮
地不可極我思古人兮為之太息古之人兮謂誰山之
中兮水之湄孤舟兮容與俯狎步兵兮仰招鷗夷非夫
人兮爾曷從之

鷄鳧行

鷄與鳧皆鵪育鳧愛水遊雞愛陸鳧昔未辨雌與雄母
不顧之雞為伏雞渴不飲飢不啄以腹抱卵誰敢觸鳧
脫鵪雞鼓翼日日庭中求黍稷嗚呼鳧使之食鳧羽
日禪禪一朝下水不顧雞雞在岸鳧在水賦性本殊徒
爾耳雞知為母不知鳧恨不隨波共生死

刈草行

原上秋風吹百草半青半黃色枯槁城頭日出光杲杲

腰鎌曉踏城門道門頭草多露未晞爾鎌利鈍爾自知
一人刈草一馬肥馬不肥兮人受笞城中官廩三萬匹
一匹日餐禾一石

秋懷二首

羣動夜已息秋聲適何從仰視天宇高微雲浩無蹤明
月在庭戶河漢上橫縱既莫知所始何由究其終我獨
絃我琴微風入疎桐寫作清商調感慨意無窮

我有一尊酒獨酌不成歡豈無骨肉親悠悠隔河山亦

有平生友合併良獨難古人千載上世遠不可攀何如
與明月徘徊松桂間月既知愛我流輝照衰顏我亦知
愛月託心同歲寒長願玉宇淨河漢生微瀾此月不可
負此樽不可乾天地等逆旅流年若驚湍古人雖云遠
其言美芝蘭舉觴以和之對月長盤桓

待王子充未至

屏跡遠城闕幽棲向林阿永懷同心友褰衣起婆娑憶
昨走京邑彌年阻關河結客燕趙間頗覺增悲歌逸驥

謝羈紲冥鴻辭網羅所念聖哲遠中心良匪他夏屋蔭
嘉木芳池發新荷須君此弭節日夕共委蛇

夏日喜友見訪

兀兀少寤語悠悠多遠懷歛跡昉僧夏凝神企心齋美
人忽至止良友與之偕關其類逃虛從爾覲所諧跡邁
志彌愜情敦禮無乖衣褐貴懷璧屬辭慙類俳積雨霽
初夕清颼埽餘靈願言念幽獨日此憩朋儕

通州

渡江潮始平入港濤已落泊舟狼山下遠望通州郭前行二舍餘四野何漠漠近郭三五家慘澹帶藜藿到州日亭午餘暑秋更虐市井復喧囂民風雜南朔地雖江淮喬俗有魚鹽樂如何墟里間生事復蕭索原隰廢不治城邑僅可託良由兵興久羽檄日交錯水陸輓粟芻舟車互聯絡生者負戈矛死者棄溝壑雖有老弱存不克躬錢鏐我軍實王師耕戰並宜作惟仁能養民惟善能去惡上官非不明下吏或罔覺每觀理亂原媿乏匡

濟畧撫時一興慨悲風動寥廓

海安

淮海水為利轉運有常程積渠如積金守防如守城邇
聞渠隄壞水決如建瓴我軍賴神速僇力障顏傾舊防
幸已復新畚亦宜興古人慎舉衆日費千金并剋敵務
克糧足邊資力耕矧茲淮甸間沃野富吳荊州萊日加
闢餽歲彌增勿使土遺利坐令儲峙贏東南力可舒
根本計非輕欲弘中興治斯事力當行陋儒無長算觸

事有深情冉冉趨畏途戚戚慎宵征

泰州

吳陵古名邦利盡揚州域舊城雖丘墟新城如鐵石昔
為魚鹽聚今為用武國地經百戰餘士恥一夫敵征人
還舊鄉下馬問親戚蹢躅慨蒿藜徘徊認阡陌桓桓霍
將軍出入光百辟位重言益卑功高志彌抑擔欲報仇
讎不肯懷第宅人羨到家榮驚喜爭太息白日照旌旗
閭里有顏色皓首太玄經雖勤有何益

上樂

夕次泰州郭朝行上樂里密雨灑蒹葭秋風拂菰米頗
聞承平日魚鹽賤如水簫鼓樂叢祠謳歌動城市中原
正格鬪擊柝聞四鄙官道日秦蕪生人得螻螳依依煙
際舟兩兩舟中子來往賣魚鰕出入官軍裏生長離亂
間不識紉與綺失喜見王師被服多華侈買物不計錢
僕僕更拜起何當罷戰伐萬國收戎壘山河歸礪帶車
書復文軌有地盡蠶桑無人不冠履腐儒亦何需歸山

守粉梓擊壤樂餘年此樂無窮已

令丁鎮

水路由下樂前赴令丁鎮落日淡平蕪荒村帶寒燐曩
時富魚稻稅薄民不困蓮芡每時豐亦足備饑饉江湖
歲或艱老弱行蝨蝨相攜就淮食不得辭遠近四野今
盡荒百畝無一墾鞠為鳬鴈區無復限封畛師行輜重
隨士飽筋力奮經費固有常變通亦宜論吾聞古賢將
羊陸開吳晉食足邊備多高標邈千仞

務子角

頻歲事行邁敢云筋力衰官軍渡淮海父老迺旌旗騎
士盡驅虎舟師皆水犀踴躍趨敵場謳歌雜華夷行行
務子角所過悉瘡痍草木未黃落風露已淒其僕夫跼
謂我歲暮寒無衣故鄉日以遠道路實嶮崎我方戒徒
侶師行有成期貴賤皆形役遑敢恤其私賴有同袍彥
議論各瓌奇有酒即共飲聊復慰羈離

海安過牐得風出爛泥洪

舟過海安牖路轉爛泥洪水行九十里決漭趨秦潼月
黑星漢高四顧無人蹤縱有百尺牌不如數尺篷是時
天宇霽餘霞散晴空篙師無他術仰面呼南風夜來水
鳥鳴出沒西復東其聲類人嘔聞者思挽弓吾聞亦駭
異莫究吉與凶得非卑濕區竅池蚊蚋鍾暑夕咬人膚
蜂蠆尚可容此鳥號蚊母蚊吐利於蜂往往陂澤內雌
呼命其雄春氣一以和託巢蘆葦叢此鳥信可憎彼蚊
幸未逢所憂亡命徒持刃匿草中晝伏夜間伺為毒甚

斯蟲我方事師旅禁暴哀人窮此輩若不除厲民安有
終所過戒吏卒反覆開盲聾爾寔備官守責在兵與農
自古處邊圉盜賊商旅通陽德始發生人事宜肅雍簡
書雖有程我行憂慮從歎息行路難何由辭轉蓬

青絲絡馬頭送李彥章

青絲絡馬頭游宦古蘇州蘇州城東萬斛舟前年運米
直沽口送別江頭折楊柳承恩頭插上陽花錫宴尊傾
光祿酒江上今年楊柳黃辟書千里有輝光勇騎閭外

將軍馬飽食閩中荔子漿閩中女兒歌白苧把酒勸君
起為舞將軍好文不好武自古閩中稱樂土

送李景先錄判

閩門柳枝短君行不可緩贈君不折楊柳枝勸君飲酒
金屈卮丈夫將身誓許國何用當歌傷別為青絲絡鞵
黃金勒游宦鄱陽山水國何處春風最憶君琵琶洲上
蘼蕪碧

十六日解維值北風大作復泊北門

風急江難渡，春寒雪更飄。
濟川雖有楫，跨海恨無橋。
使節辭吳近，官軍去楚遙。
北門仍繫纜，山雨夜蕭蕭。

寄玉山

江上秋陰日漸多，思君不見奈愁何。
風高澤國來鴻鴈，露下汀洲落芰荷。
公子文章裁重錦，美人衣袖翦輕羅。
畫船亦欲溪頭去，聽唱花間緩緩歌。

婁江即事簡郭義仲瞿惠夫秦文仲陸良貴兼寄
顧草堂

婁江江上樓居好滄海海頭城邑新
蠻郎打鼓爭起柁
鮫客捧珠思售人風燈照夜不數點
霧月湧波才一輪
浮生會合豈易得看劍引杯寧厭頻

陸氏別業

窈窕西池一徑通赤闌如畫倚晴空
風微燕雀飛塵外
日皎龜魚在鏡中
入谷謾誇盤往復卜鄰宜住灤西東
綠陰滿地新荷發猶勝開樽勸碧筩

題倪元鎮畫

西池亭館帶芙蓉雲水蒼茫一萬重此日畫圖看不足
滿簾秋雨夢吳淞

胡翰十九首

翰字仲申

一日仲子

金華人國初以薦授衢州教授

召修元史成賜金帛遣歸有胡仲子集

宋景濂云先生

出言簡與不煩而動中繩墨如夏圭商散望而知其非今世物也朱叔英云仲申五言古詩超然實邁雖潛溪亦莫企及餘子何足道哉

詩話明初浙東睦有徐舫詩派既有趙次誠詩選越有求漁鍾秀集而金華承黃文獻潛柳文

肅貫吳貞文萊諸公之後多以古文辭鳴顧詩
非所好以詩論吾必以仲申為巨擘焉獨孤及
之論曰五言之源生於國風廣於離騷著於蘇
李盛於曹劉漢魏作者實有餘而文不足以今
揆昔則有朱紘疎越太羹遺味之歎誦仲申五
言正猶路鼗出於土鼓家鼗生於鳥跡庶幾哉
升堂之彥乎宜潛溪有學
林老虎文淵鯨之目也

湘筠辭

湘之山兮西迤湘之水兮東鶩何箇籬兮孔多望不極
兮湘之浦帝子去兮雲中俾夫人兮延佇曾莫樹兮椒
蘭又莫搴兮蘅杜載雨兮載陰滔滔乎誰與度將以遺

予兮琅玕抱幽貞兮永固

鬱鬱孤生桐

鬱鬱孤生桐託根鄒嶧巔皎皎白素絲出自岱畎間一朝奉庭貢妙合良自然桐以為君琴絲以為君絃中含希世音置君離別筵征馬慘不嘶僕夫跼當前君行千里道豈惜一再彈南風日渺渺清商動山川和者昔已寡聽者今亦難

人生苦逼側

人生苦逼側莫處蠶觸間殺機起不測朝夕相構患尺
書下齊城凡土封秦關用意何崎嶇舉世尚其賢湯泉
水長溫蕭丘燄長寒天地有至性貧賤吾所安

擬古

四首

一夕復一夕一朝非一朝昨見春花開忽覩秋葉飄人
非金石姿安得長不彫窮年事觚翰駕言遠遊遨手提
具櫛劒拂拭鵬鵠膏含精變光彩上薄青雲霄願君勿
棄置佩此長在腰南山有猛虎西江有長蛟斫蛟取猛

虎始貴非鉛刀

節節復足足雄鳴雌自續借問此何音有鳥人不畜三
文被身體五采爛盈目聲諧九成奏靈出衆羽族自從
阿閣傾再改岐山卜千年不來儀四野多鰲鱗世德誠
已微天路清且穆願因東南風吹度玉笙曲

千里不唾井與君相別難風塵雖異路恒願同悲歡在
金莫為玦在玉當為環聯以翠織成宛轉衣帶間相望
燕與越寸心良自堅日入已三商憂來翻百端遙遙託

清夢不知寒夜闌

日長自愛惜夜長復悽惻人生幾何時少壯已非昔涼
風動萬里起念南與北山川路杳杳車馬去不息燕趙
高聲名荆揚壯材力仲尼七十說未遇身削跡為雲不
上天馬能雨八極

示項生

去日不可追來日猶可期朝采六藝英夕玩忘其疲海
是衆水積聖亦塗人為挾冊自有得焉用比皋夔

游仙詩

夙志慕仙術笑傲人間春
朝陪瑤池宴暮揚滄海塵
道逢安期生遨遊乘采雲
粲然啟玉齒遺我紫金文
天地此中畢世人不得聞
受之今十年留待逍遙君
青鳥從西來飛去扶桑津
寄書久不到白首悲秦人

卧龍岡觀賈秋壑故第

宋祚移東南會稽國內地
白日照城郭相君開甲第
蜿蜒卧龍岡高出列雉背
審曲立萬楹增雄踰九陞
飛拱

凌丹霞交疏激清吹上極高明居下有幽深隧棲甲戒
不虞為計亦已至以此忠社稷寧復憂隕墜揚揚昧所
圖擾擾復多制崦嵫日西薄祝栗風南厲魯港十萬師
聞鉦一聲潰木披本先蠹隄壞川如沛詩人謹厲階人
禍豈天意摩挲岡頭石零落重奎宇山川一何悠蒼莽
鴻飛外舊時賀老湖酒船總堪繫吾寧慕賢達聊以抒
長慨

呂梁洪

河水趨山東四曠無險塞呂梁扼其衝凜若萬強敵水
勢與石關終古怒未息舟行齟齬間衆挽不餘力進始
踰跬步退忽落千尺長年起相語茲土神所職登祠奉
嘉薦拜跪陳下臆船頭勇牽纜檣表高挂席好風東南
來送我天北極叱馭誠足欽垂堂詎遑恤昔聞莊叟言
有山在離石懸水三十仞魚鼈皆辟易孰隳天地性遂
拯生民溺鴻飛九州野吾願觀禹迹

夜過梁山灤

日落梁山西遙望壽張邑洸河帶灤水百里無原隰
葑參差交舟揖窈窕入劃若厚土裂中含元氣濕浩蕩
無端倪飄風向帆集野濶天正昏過客如鳥急往時冠
帶地孰踵萑蒲習肆噬劇跳梁潛謀固坏蟄古云萃淵
藪豈不增快悵蛙鳴夜未休農事春告及渺焉江上懷
起向月中立

書黃賀州平蠻事後

荆楚綿百越襟帶極遐裔連山限車轍外薄海無際風

氣何紛厖羣蠢動相噬古雖郡縣置畫地出租稅負險
恒自固犬牙植形勢聚若蜂蟻來散如鳥鼠逝堯仁不
能覆往往思一雉懸兵萬里外暴露蒙瘡瘍亦有內齊
民詿誤混狂獠巢穴牢弗破根本先自殪天遺槃瓠種
出入民患害聖指戒不虞窮討諒非計皇靈冒下土赫
赫火俱厲日月所出入有生盡懷徠賓賀崎嶇間苞孽
久聯締遣吏得黃侯為國開信誓王師不血刃緩頰下
推髻列功奏天子璽書遠頒賚賜以大銀盃副之金帛

對嶺海數十城安得百其喙我聞范史言此屬非難制
力弱校弄薄非可羗戎例漢廷慎擇守祝良復誰繼侯
今鬚盡白侯心甚豈弟分符浙水上應念東人勸蠻徭
尚有知東人敢忘惠作詩期不隕庶以示來世

西村老人隱居

振轡起陳力投簪遂辭祿吾今見伊人逍遙在郊牧令
節春載陽芳辰日初旭鳥鳴高樹顛牛飲澗溪曲翳翳
桑柘陰藹藹來牟熟耰耞返故畝經過候新躡高榻生

風涼練衣無暑溽披帙欣自悟臨觴復誰屬情真不肅
客意豁已忘俗列生談力命老氏貴止足

夜宿寶石精舍

出郭隨穉子薄暮投山扉葉落故園樹危柯風更悲勞
生各已息不知夜何其上人池閣中燈火深相依盈樽
豈無酒多病久不持啖我園中果飽我以豆糜出戶見
明月踏月褰裳衣悠悠故意長落落落新知稀冉冉歲云
暮百爾慎所歸

京口紀行

大江風西來波濤一何浩我舟不得發徘徊越昏曉衡
運已朔易曜靈忽東杲早出南徐州草乾霜露少慘慘
沙塵飛軋軋車輪繞寒氣來薄人重裘僅如縞日高衆
鳥翔天末孤帆杳川流與岡勢合杳自回抱人生大塊
間孰能出其表勉為辛苦行益見顏色槁人言野多虎
前驅善相保顧非千金軀祇欲仗穹昊共子陳此情歸
來卧蓬島

南京遇蘇平仲編修

南州苦寒月雨雪久不霽風沙滿長道四顧心飛揚君
子有行役束書歸故鄉故鄉浙水上遠在天一方父母
及兄弟昔別今五霜我昨來自東音問不得將為言起
居好良足慰子腸巍巍帝王都濟濟人物場噦噦爭先
鳴翩翩迺高翔六館走相送如失孤鳳皇惜茲歲華晚
眷彼川路長卧聽吳門鐘歸共越人航上堂拜家慶兄
弟同樂康歡言酌春酒拜舞迎春陽願言千丈暉長照

百年觴

青霞洞天偕章三益僉事觀石枰

太末一為客倏忽三四齡常恐玄髮變未諧滄海情今
晨屬休暇文彥皆合并方舟濟沙步飛蓋指巖扃青霞
天之表赤日午正亭息陰無擇木抱渴無藏冰寧知大
火維有此真福庭巨石跨千尺如梁架青冥深疑地肺
開洞見天光明玉樹交左右禽鳥無一聲涼風度澗水
炎濁蕩然清昔聞偶奕者坐隱交心兵相持勢方急旁

睨耽若醒柯爛胡不歸海枯固其恒
蠻觸遞翻覆大化何由停不如飲美酒
且置石間枰

送呂君采元史北平

又見陳農去遙臨折木墟山川遊幸後
文獻亂離餘備極傳聞異歸從直筆書
百年殷監在盡獻玉階除

陶凱二首

凱字中立天台人至正丁亥鄉薦洪武
初召修元史除翰林應奉文字陞禮部
尚書出為湖廣

參政致仕復召為國子祭酒以參政致仕

詩話洪武元年帝既平定朔方金匱之書悉輸
祕府冬十二月詔發所藏元十三朝實錄纂修

元史命宋濂王禕為總裁官徵山林遺逸之士
凱與初門汪克寬德輔金華胡翰仲甲餘姚宋

元禧无逸臨海陳基敬初休寧趙汙子常新塗
魯魯得之淳安徐尊生大年鄭傳恕如心新喻

趙璜伯友長洲謝徵元懿傅著則明高啟季迪
寧波張文海及黃麓王猗凡一十六人相傳龍

溪林弼元凱亦與史局然余曾見內閣所儲林
登州集其序傳均未言其修史蓋林所修者禮

書也至大年詩集有送孫琬公刻還鄒陽作其
一云宿德高年史局尊經句病廢想丘園相期

麟至方投筆忽報驪歌已在門幽谷便須從李
愿空齋恨不聞何蕃芝山當戶青如舊笑把青

蠻人酒尊其二曰汗牛何啻三千疋葉相兼
二百年大史網羅無缺事諸生綿邈魏新編綠
陰晝永毛錐健青瑣宵分燭炬連千里揚帆東
匯澤也應回首會丹鉛潛溪亦有送琬詩云帝
曰元有史是非尚紛採苟不亟刊修何以示悠
久宜簡歲久臣學識當不苟衮斧嚴義例執筆
來聽受使者行四方持檄盡蒐取非惟收譽髦
最欲尊黃耆予時奉詔來君亦至鍾阜一見雙
眼明不啻蒙發茹大啟金匱藏一一共評剖發
凡及幽微勝辨白與黜奈何君有疾客邪干氣
母翩然賦式微使我心中疚則琬實與編厚者
宋无逸寄潛溪詩云當時十八士去留各有緣
所云十八士者公剡居其一矣以先去故未得
列名也是年秋八月書成丞相宣國公李善長
表上時克寬訪基元禧輩皆引歸不受爵仕者
亦未盡通顯惟凱與魯位三九之列二公詩俱

平傳祭酒長歌
特雄放可喜

長平戈頭歌

長安野人鑿地得古戈上有疑字歲久俱減磨惜不能
如豐城古劍射牛斗吁嗟戈乎奈爾何但見青銅凝寒
暮煙紫月黑山深夜飛雨恨血千年猶未銷荒郊夜夜
啼冤鬼當年趙括輕秦人降卒秦坑化為土嗟哉趙亡
秦亦亡落日荒城自今古摩挲爾戈一問之令人為爾
生愁思何不以爾為鍾鐻何不以爾為鼎彝吁嗟戈乎

徒爾悲爾今還當太平世人間銷兵鑄農器願壽吾皇
千萬年終古不用戈與鉞

贈琴士施彥昭

君不見鳴琴無賞音伯牙絕絃仍破琴又不見斲琴無
良工焦琴終為爨下桐大江之南多好山孤桐往往生
其間武林城中百萬家斲琴施氏良足誇嗟哉施氏之
外無復人桐樹枯死終為薪今人好尚與古異人間雅
琴多棄置雅琴苦少秦箏多嗟哉施君將奈何

曾魯一首

魯字得之新淦人應召纂修元史編類禮書入

儀曹為祠部主事超拜禮部侍郎以病乞歸道

卒有守約齋集

徐大年云南京有博學之士二人以舌為筆者曾得之也以筆

為舌者宋

景濂也

詩話侍郎在史館潛溪稱其補苴罅漏功最多既為志墓又替其像云當議禮而考文較損益於錙銖蓋其所長不在吟詠也詩稿失傳僅錄其送黃尊師還九宮山一首黃尊師者雙井人活翁八世孫也弱冠以門資襲爵為同知府患風痺棄官有神師號金花君者曰吾能療汝疾

愈當為道士尊師許諾金花君以帛粘其膚燭
灼之七日而起乃之興國九宮山為道士主欽
天瑞慶宮其徒千八太祖西平江漢尊師迎於
鄂渚應對稱旨後八年召至南京命儀曹設燕
享之及還侍郎及潛溪俱送以詩潛溪詩曰崔
巍九宮山翠巖倚曾青飛觀峙後先宸奎爛晶
熒中有遯世翁霞衣佩蕊珩仙徒一萬指執簡
聽使今年來遣兵焚散走如流星翁獨牽青牛
尋雲自躬耕翠華幸江漢扈從森幢旌俯伏黃
鶴磯再拜陳中情天日下臨照簪裳受餘榮今
又奉璽書翩然覲神京大官給珍膳法酒雙玉
餅祇因奉景運重際泰階平致使方外士恩寵
霑鴻靈一旦賦歸歟行裾逐雲輕自言當弱冠
綠袍佐山城風露感末疾離家煉黃寧藥煮日
月鼎符書龍虎經中氣昭象先玄覽極窈冥欲
期啟泥丸艸飛出孩嬰名花滿皇都春風語流

鶯景物非不饒歸思竟纏縈芳歲去如矢逝波
日堪驚純陽一銷鑠重陰遂相乘余聞重自媿
顛毛類枯莖逐物向役役棲身亦甞甞幸有一
寸丹能與萬化并何時滴秋露相期注黃庭侍
郎則賦長歌中間叙尊師本末頗詳山為真牧
張真君道靖鍊丹之所故詩有真牧之子世莫
傳之句其事不甚著故具書之

贈黃道士還九宮山

我家羣玉山南陬君居蒙頂最上頭相望欲識嗟無由
搖搖心若風中旂君從少年慕遠游摩斥八極隘九州
下視起滅如浮漚九宮山高明翠蚪真牧之子世莫儔

君居其間業清修五十餘載無悔尤翠華昔駐鸚鵡洲
承恩召對黃鶴樓敷陳屢荷天語酬大官醉以白玉甌
去年弓旌復旁搜麻鞋徑入朝晁旒神皋繁麗不肯留
還山日夜稽首求山中之人書遠郵雨餘黃獨苗新抽
琅玕芝草弄春柔不歸負此巖壑幽龍江送別情悠悠
鄉人歌作商聲謳

宋

禧

四首

禧初名玄禧字无逸餘姚人學於楊維禎洪武

初徵修元史有庸菴集

詩話无逸有盛名詩見於選本絕少予購得其
集句如欲雪未雪雲葉暗似暮非暮風花寒隔
河鷄犬春聲急繞屋田園豆葉肥九歲兒郎能
負米半生客路未歸田當時未覺青山好此日
重來白髮多臘月雨連元日雨故鄉人作客居
人借人几榻開漁舍送客壺觴出酒家秉燭山
林連夜宿思家道路幾人歸驚心世事三年後
照眼梅花二月初且復殺雞留宿客未須采藥
入青山空中書寄仙人鶴月下詩成佛寺鐘臘
雪已消三尺盡春潮初送一舟行試看墨本打
碑賣勝謁朱門冒雪歸十日看山坐西閣一春
多雨怕東風惡客不來成好夢大兵已過定豐
年南山種樹人猶在東閣看花客再來勝地江
山兵後見馬天風雨客邊聞青春誰解看花去

白髮真成秉燭遊身到名山頭已白眼明秋日
葉初紅惜春幾度行花徑載酒先期過草堂落
筆十年月後在懷人三絕眼中無梅梁水涸魚
龍遠麥隴沙乾鴈鶩稀人日晝陰開晚照老年
寒極愛春風艱難人事都非舊貧賤交情倍覺
真黃葉又經秋夜雨青蘗曾踏歲寒冰南山臘
雪新年在東浦春潮昨夜來樹繞石頭知客路
巖迴谷口見人煙鐘聲曾聽孤舟夜詩卷今題
落葉時二月江村三日雪百花時序半春陰對
法流轉頗饒自然之趣其寄景濂學士詩云修
史與未役乏才愧羣賢強述外國傳荒疎僅成
篇則自高麗傳以下悉无逸手筆覽元史者所
當知也

看雲樓

孤雲何處來相對纔咫尺隨風出山去青天忽無跡往來固無心幽人候朝夕高樓為徘徊無使長相憶

送友人

老去復相見別來今幾年窮鄉君再到多病我堪憐渡水山雲薄當樓海月圓客邊愁送客頭白聽啼鵑

次韻徐性全同宿小山陳氏書樓有作

出郭天猶暖登山興獨深雨餘初衣褐秋盡未聞砧黃葉經過處青燈故舊心客樓頻對榻倡和有清吟

四月十三日偕岑宗昭胡斯美及其徒弟斯敏游
宿竹山精舍明日題詩於壁而還

龍潭橋西山谷中茅屋住者皆樵農兵前送官大木盡
春後斫筍高峰重同行何人黑漆髮精舍有佛黃金容
三更月明五更雨子規來叫門前松

徐尊生 二十一首

尊生字大年淳安人召修元史授翰林應奉文
字有懷歸稿

詩話大年詩格清老譬諸畫手絕無鉛粉之飾
顧諸選家多不甄錄何也其懷歸集中有授翰
林應奉詩云布衣昨日孤寒士新苑今朝已授
官幼有文章淹滯久老無筋力進趨難隨班香
案晨簪筆列坐宮門午賜餐早晚歸休宜引分
免教白髮點金鑒則當日業通籍矣又呈崔尚
書五古則禮部尚書鹿也大年雖自引求去而
省臣留之續修庚申君史又編集禮樂書迨三
年九月大明集禮書成乃始得歸故歸舟詩云
兩年留滯帝王州也至六年九月詔編日歷復
與纂修之列又固辭還山拂帝意出為陝西教
授未行而卒錢遵王引睦州志謂曾授翰林待
制不就
誤矣

挂劍臺同楊廉夫作

荒臺多悲風下馬弔古人古人重意氣今人亦霑巾湛
盧化為土意氣千古存顧瞻四鄰交朝盟暮仇冤孰持
不言諾慰此泉下魂古人不可見今人難重論

朱太守祠

太守得意日五十當行年余年適復爾出山良自憐東
風過荒祠下車一慨然浮名亦何有千載隨飛煙富貴
非所願夢想東皋田

題番陽蔡淵仲散木菴

蒙莊古達士涉世熟憂患著書雖寓言垂戒非誕謾有生勿為材祇以身試難杞梓堪棟梁何曾保枝幹彼樗乃散木匠石眼不看終然老山林長將櫟為伴年壽齊古椿傲晚寒暑換青黃亦所天豈異溝中斷一篇三致意懇懇義相貫淺窺勿深求千載付浩歎就中一轉語妙處最宜玩既全曳尾龜復殺不鳴鴈萬事貴無心倚伏昧前算材與不材間至理須剖判舉似散菴人笑齒為余粲

呈崔尚書

愚生何所長有若不材樹臃腫復拳曲蒙莊匪虛語大
患緣有身過客棲逆旅常懷溝壑憂寧軫經濟慮分甘
老山林誰復歎遲暮州司忽見臨驅迫出蓬戶欲行勢
倉皇不行恐遭怒束書竟登塗妻子那暇顧史筆豈所
堪努力強枝拄未免取謗譏何從得裒予金幣落九天
深慙聖恩誤陞辭許還山老不任馳騫硯田久已荒尚
可不歸去況予燕雀姿難造鴛鴦羽樊籠久飼養反是

金定四
卷之
損天賦自秋俄及冬懇款曾屢訴情急鳴聲哀何啻啼
嬰孺恭惟及物心四海仰霖雨便期副所禱俾遂屏幽
素江頭買歸舟凌晨首先路

游上善觀

波綠新安江草青賀齊城出城偕逸侶涉江暮春行舟
維古岸迴徑轉深谷晴琳宮恣幽討從容振塵纓花砌
藹微馥松房颯幽聲偶值苓簪翁手挈溪螺盈餉因觀
主厚味許騷人并以茲雅趣愜彌使吾懷清杯觴竟綢

繆詩筆亦縱橫浮生此暫聚忽散如煙輕遠送何依依
顧慙方外情

佩刀行

有序

金華之永康有山曰雲巖拔起天半有巨舟藏
壑中舟尾翹出如蠶一釘墜巖下野僧得之以
遺張君孟兼製為佩刀銛利特甚尊生為作歌
神人藏舟半天裏絕壁崦嵫露舟尾錚然有物墮中宵
八觚峻嶒長尺咫野僧拾之歸張公化為天矯蒼精龍

不知何世何年悶奇氣刺犀斷虎一旦生神通魑魅却
走妖邪空張公佩到蓬萊殿天上神仙驚未見青絲纒
懸白玉環當晝孤光搖冷電為君淬厲向盤根縱有青
萍何足羨他年辭榮歸浙山莫行金華赤松間精靈感
會起霹靂便恐飛去無時還

送宋君諤還明州

勞勞亭邊楊柳青新栽白紵歸衫輕我情頻似楊柳亂
君意已逐浮雲行一日相逢尚難別何況同居兩三月

君歸未久我亦歸歸家莫遣音塵稀

松江陸氏耕隱軒

吳下陸龜蒙超然太古風圩邊施蟹簍澤畔築牛宮香
稻三千頃高堂八十翁隱名逃不得傳過大江東

游鍾山過寶珠峰頂西軒贈浙僧慈隱

寶珠峰頂危亭角邂逅高僧失垢氛便啟軒窗臨絕壁
還留賓客坐層雲簷端優鉢千香樹肘後楞伽幾卷文
謾說空門無繫著也須攜手惜輕分

送田無禽任太原同知

無禽家世齊諸田學術乃自余忠宣迨迨之官太原郡
戀戀回首京都天三河從昔產豪傑貳守得子稱才賢
當筵不作慘別意一杯泛以黃花妍

婺源汪氏樵隱

芙蓉高嶺含清暉宣平之居近翠微斧斤丁丁響林薄
雲霧滃滃霑人衣石碁盤邊莫閒坐樵風溼裏當早歸
歸來絕不到城市自是世人相識稀

讀元史偶書

前朝實錄與修纂異聞可紀不可刪窮河直至星宿海
祭天遠在日月山笙名興隆雜鳳吹斧號嘒正當龍顏
似茲前古殊未有偶吟一二資餘閒

詩話或問大年讀元史詩中語因疏其事於左
黃河之源元潘學士昂霄志之柯博士九思序
之陶徵士宗儀述之世祖至元十七年諭招討
使都爾蘇佩虎符以行自河州寧河驛度殺馬
關約五千里始抵其地越歲乃還言河源在土
蕃朶甘思西鄙有泉百餘沮洳散渙粲若列星
以故名鄂端諾爾鄂端譯言星宿也元史祭祀
志憲宗即位之二年秋八月始以冕服拜天於

日月山王禕興龍笙頌序云興隆笙者世祖皇帝所自作其制為管九十列為十五行每行縱列六管其管下植於匱中而匱復鼓之以鞫自匱足至管端約高五尺仍鏤版作鳳形繪以金采以圍管之三面約廣三尺加文飾焉凡大朝會則列諸軒陛之間與衆樂並奏每用樂工二人一以按管一以鼓鞫以達氣出聲以叶衆音而樂之奏成矣輟耕錄云興隆笙在大明殿下其制植衆管於柔韋以象大匏土鼓二韋索按其管則簫鳴篳首為二孔雀笙鳴機動則應而舞凡燕會之日此笙一鳴衆樂皆作笙止樂亦止旁正行以蒼水玉候造高二尺有奇廣半之自殷時流傳至今者朝會時一人執之立於陛下酒海之前所以正人不正之意志雅堂雜鈔云宣和殿所藏殷王錢長三尺三代之寶也後歸於金元史禮樂志元正受朝皇帝出閣侍儀

使引導劈正斧中行至大明殿外劈正斧直正
門北向立俟兩宮升御榻劈正斧退立於露階
東故趙孟頫宮詞云天步將臨玉斧來萬運祿
納新宮詞亦云千官鵠立五雲間玉斧參差擁
畫闌共也一器也而或曰斧或曰鉞按
禮有朱干玉戚然則此即玉戚云爾

七月六日生日有感

客中生日近七夕老子行年當五旬夢寐不忘林壑趣
形模難作市朝身已甘素髮欺凌我祇怕緇塵染污人
歸去秣田秋正熟新醪爛醉甕頭春

稷下

春官承制促成書東觀遺編任卷舒草草便垂千載後
遲遲難俟百年餘淹中舊學文空在稷下諸生術本疎
浪說徐生善頌止懷鉛竊食媿何如

新年

江上年華與浪奔天涯心緒向誰論持竿本住桐廬岼
被褐偶來金馬門足躡風雲非老事鬢垂霜雪是愁痕
韭苗薺葉添新綠昨夜東風入故園

春望

浩蕩波濤海一涯紛紛平陸起龍蛇
鵑聲只帶中原恨
燕子還思舊主家
不見昔年遊賞伴
愁看滿地落來花
傷情宋玉愁何限
目極遙天日又斜

送博士錢子予還鄉

乞得成均老病身
懸車便向鏡湖濱
都人共羨楊司業
鄉友爭迎賀季真
落絮繽紛攬別恨
歸帆縹緲傍殘春
欲知後夜相思夢
鳳闕西頭月色新

畫馬

白馬被朱韉牽來過御前憶曾何處見金水小橋邊

春山樵唱 二首

共穿石徑踏春晴却向山腰分路行樹暗雲深莫相失
隔林遙認唱歌聲

春殘驟雨過蒼巖瀑流千尺響潺潺貪坐莓苔洗雙脚
牛羊歸盡不知還

歸舟雜詠

溪雲黯黯覆溪潭雲罅疎星見兩三半夜不知何處雨

遙看飛電閃淮南

謝徽一首

徽字元懿長洲人以布衣召修元史除翰林編
修改吏部郎中辭歸復起國子助教卒于官有

蘭庭集

題宋復古鞏洛圖

青山鞏洛舊林園彷彿昇平古意存
雨外人歸秋葉浦
煙中鳥下夕陽村
昔年題宇宸光合
宋思陵題簽
今日披圖

野興繁風景西湖仍不異惟餘故老說中原

明詩綜卷六

欽定四庫全書薈要卷二萬四百八十

集部

明詩綜卷七

翰林院檢討朱彝尊編

朱右 三首

右字伯賢臨海人洪武三年召修元史六年修
日厯除翰林院編修七年修洪武正韻尋遷晉

府長史有白雲橐

張楠渠云伯賢感興當不在
魏晉下郭公葵云伯賢廣

琴操出人意表非徒擬而作將歸操云九州博
大兮將予遂之聖人待天下之心也猗蘭操云

子如好修維我之求子如不好于我何邇道在我躬安於命也龜山操云周公上天奈龜山何家國之治否實存乎其人也拘幽操云日月有明容光弗留輔相之蔽也岐山操云既有吾土毋戕吾民太王之志也履霜操云民生有知以順天賦天下之為父子者定矣殘形操云曰修爾躬自天之佑君子惟自修而已琴操作於韓子之後立言尤難其宜與古人並傳哉靜志居詩話元史初成為期不過六月故極其牽率徐大年詩所云草草便垂千載後遲遲難俟百年餘足已李善長表進文亦云據十三朝實錄之文成百餘年粗究之史於時以順帝三十六年事無實錄可徵未為完書孝陵復詔儀曹分遣呂復張貫歐陽佑黃盎等一十二人分行天下凡涉史事者令郡國上之又遣儒生危於等歷燕南北開局於故國子監采訪文字請

行中書官印封識達京師二年二月仍命宋濂
王禕為總裁官續完元史纂修一十五人右與
崇德貝瓊廷珪義烏朱世廉伯清青田王廉希
陽嘉定王吳常宗金華張丁孟兼河南高遜志
士敏江陰張宣蔭仲當塗李汶宗茂吳張簡仲
簡青城杜寅彥正東平李懋登俞寅殷綱而趙
璉伯友仍與其列以是年七月竣事其率不獨
如故也獨怪宋王諸公負一代重望即伯賢常
日亦以理學文章自命於春秋傳國語則有類
編於戰國先秦而漢則有秦漢文衡於唐宋則
首定韓柳歐陽曾王三蘇文為八先生文集於
元則有文類而又於史則有歷代統紀要覽通
鑑綱目考證其言曰凡民之欲足而止惟學不
可以足而止可謂有志者矣宜其在局討論精
詳用成信史乃任其繁蕪重複遂出宋金諸史
之下何哉良由孝陵猜忌諸臣畏觸逆鱗表進

之書不復更其隻字但就庾中君事補綴與前編絕不相蒙致有一人而作兩傳者史至此驚蛺蝶之不如矣白雲素凡十卷予僅鈔得前五卷止有琴操無詩其後五卷僅得內閣本一過眼恨未鈔成足本琴操有郭公葵跋公葵吾鄉人唐處敬詩云我昔居秀州友有徐一夔好為古文章自矜少所推每論其鄉人屈指二三希云有善詩者郭姓字公幾不習時所好刻意追古詞前後數百篇一一皆珠璣郭名秉心惜其詩無一存者可歎也

遣興

幽逕何偏側蔓草沒行路此生苦不辰出門畏多露遲
回蒙山居仿像商顏步籍籍春花萎冉冉芳年度寄語

素心人朱顏恐非故

次韻答白雲悅禪師

向來同覽赤城霞
山寺吟行石徑斜
來往風流成二老
文章交好屬通家
平安屢問東橋竹
寄遠曾將小院花
支遁肯酬南鴈約
相期歲晚度年華

春懷

舵樓空闊望京華
蘆荻江楓岸岸花
山色漸濃昏霧薄
水光遙動夕陽斜
故鄉鴻雁書千里
遠浦牛羊屋數家

邊塞柳營多苜蓿石田徒憶舊桑麻

朱世濂 一首

世濂一名廉字伯清義烏人明初薦授釣臺書院山長洪武三年續修元史被召史成乞歸復與修日厯除翰林院編修遷楚府長史

瀧湫和韻

竹外煙浮僧煮茶草邊風暖鹿眠沙青鞵何處看山客
瀑布巖前數落花

張孟兼

三首

孟兼名丁以字行浦江人徵為國子學錄與修
元史以太常丞出為山西按察司僉事遷山東
按察副使為吳印所訐論棄市有集

詩話孟兼與景濂同里景濂薦之朝伯溫侍孝
陵論一時文人謂宋濂第一其次臣不敢多讓
又其次孟兼也然負才傲物屢凌其鄉曲及請
假還縣令丞門謁奉牲酒孟兼坐受其拜不答
鹿酒却之其亦無禮甚矣當其之官山西景濂
以文贈行有云鸞鳥之揚揚不如威鳳之難離
獅狔之彊彊不如祥麟之容容刑法之堂堂不
如德化之雍雍雍人不務德則已苟有德焉人何

險壬之不萃其行孟兼盡於此而留意哉景濂
可謂盡朋友相規之義矣卒之怙終不悛與吳
印爭許印兩上封事言狀帝怒械至闕下命衛
士絳髮梃之垂死論棄市詔印曰吾除爾害矣
善為之噫印一鍾山寺僧爾帝寵任之授室賜
金至為之復讎必期快其意而後已毋乃過與

漫興

二首

詩話杜子美集有漫興五絕九首又七言云老
去詩篇渾漫興春來花鳥莫深愁渾漫興者言
即景口占率意而作也其後蘇子瞻黃魯直楊
廷秀諸公皆襲用之押入語韻姜堯章詠蟋蟀
詞云幽詩漫興笑蘿落呼燈世間兒女段復之
詞云詩句一春渾漫興紛紛紅紫俱塵土陰時
夫輯韻府羣玉亦采入語字韻中蓋自元以前
無有讀作漫興者迨楊廉夫作漫興七首妄謂

學杜者必先得其情性語言而後可得其情性
語言必自其漫興始而其弟子吳復見心從而
傳會之注云漫興者老杜在浣花溪之所作也
漫興之為言蓋即眼前之景以為漫成之辭其
言語似却而未始不俊此杜體之最難學者自
康大詩出而世之人遂盡改杜集之舊易與為
興矣首沿其誤者張孟
兼也存其詩特糾其謬

梨花半開夜雨催無奈
李花如雪堆門外
美人不見來
東風楊柳吹千迴

青驄驕嘶金轡銜美人
二月裁春衫江頭麥秀青
蘄蘄
西湖放船開錦帆

義門鄭仲舒先生得請歸浦江予於先生同里且
親故賦是詩情見乎辭矣

鄭公去年離北平束書抱病來南京城隅邂逅喜且驚
開顏握手言再生自從南北屢構兵日夜悵望鄉關情
幾回寄書雁南征中心搖搖若懸旌苦遭喪亂百病嬰
客邊囊橐一旦傾此來四顧徒荒荒豈料吾子與合并
我時聞之涕泗橫況公素有文章名居官勝國職最清
經筵之擢轉庠黌及當玉署宦已成又為奉常典棗盛

人生際此自足榮但恨白髮已數莖懷哉屈子全忠貞
誼與日月同光晶願言夕餐秋菊英佩明月璫紉菰蘅
懸河之論春雷轟使旁覩者顏發賴索居半載留帝城
坐聽夜雨哦寒檠眼前倏忽時變更春風一見衰草萌
公家孝義好弟兄遣兒千里來遠迎乃今得請荷聖明
身若插羽乘風輕過門云別明遂行開船要趁蒸雨晴
夜久不寐視長庚長庚欲落鐘鼓鳴庭樹喔喔聞雞聲
崩緌起舞冠絕纓公歸我愁絲亂縈亦有夢寐懷先塋

如過吾父款柴荆為言恨不同趨程終當早晚乞歸耕

王 昇

二首

昇字常宗嘉定人以布衣召修元史賜金幣遣
還尋薦入翰林以母老乞歸洪武七年坐太守
魏觀事伏法有三近齊橐

詩話常宗自號媯子學有淵源集中孔子廟
學碑南門記鄉飲酒銘文甚高潔時鐵崖以文
雄東南傾動一世常宗獨作文如一篇無其
略曰天下所謂妖者狐而已矣哉而為公始為
世之男子或為則見其筆錄朱白柔曼頗有之
容無乎不至雖然以為人也則非人以為婦女

也則非婦女而有室家之道焉此狐之所以妖也文者道之所在蜀為而妖哉浙之西言文者必曰楊先生予觀其文以淫詞誘語裂仁義反名實濁亂先聖之道顧乃柔曼傾衍黛綠朱白奄然以自媚宜乎世之為男子者之感之也予故曰魯稽楊維禎之文狐也文妖也噫狐之妖至於殺人之身而文之妖往往後生小子羣趨而競習焉其足為斯大禍非淺小也文而可妖哉妖固非文也世蓋有男子而弗惑者何憂焉誦其文可謂獨立不懼者矣其為詩若神竄四曲露筋娘子篇尚沿鐵崖流派而集外有題宋復古鞏洛圖六言云斜陽欲雨未雨別嶺歸人幾人峰迴忽見月出緝子相迎澗濱頗有摩詰文房遺韻又題宋徽宗畫百合圖云偶為美名圖百合不知南北已瓜分亦有思致

秋林高士圖

嵐峰半殘陽彩翠明林杪僧塢遠鐘微歸人下山少風
杉落葉響驚起棲煙鳥攜手願言還前村月初皎

東歸有感

路斷江淮已足憂繁華猶自說蘇州萬人金甲城頭騎
十丈朱旗郡裏樓麋鹿昔遊何處草鴈鴻不似去年秋
忍將一掬東歸淚付與婁江入海流

張宣

十四首

宣字藻仲初名瑄江陰人洪武初與修元史擢翰林院編修既而謫濠道卒有青暘集

詩話藻仲入翰林年未三十孝陵以小秀才呼之既奉詔歸娶邵亨貞女求學士送之以詩所傳紅錦裁雲春莫雁蒙蕭吹月夜乘鶯足也及謫濠道卒以詩解其父溝南先生端云出世再當為父子此心終不間
幽明誦之使人心惻

孤鳳吟

梧桐生高岡枝葉菀成林上有孤飛鳳結巢在其陰毛羽爛五采噤噤鳴好音虞舜去已遠王風不可尋來儀

苟非時亦何異凡禽

九日偕張思廉楊孟載徐二岳登虎丘

招提憑崇岡石壁根空虛躋攀陟層巔歷覽壞劫餘清
商振穹昊爽氣棲平蕪雲消初旭吐木落遙峰孤幽潭
積水深修綆斷轆轤劒光欲飛騰神物今有無空令弔
古人解笑英雄愚撫茲良辰及感我芳情紆長揖當塗
者永與山林俱

與慈邑諸公會宿茅甫生駐鶴樓得夜字

白水冒平田積陰過初夏風雨招友生琴尊相慰藉飛
梯倚孤撐連峰競迴迤晦冥巖壑變空翠林木亞疎煙
截山椒微月露天罅僧鐘隔遠寺漁父候歸舍鶴影渚
雲迷風聲澗泉罷投迹山水邦脫身紛俗駕久忘簪組
累不待休沐暇飲甘心為壯時危氣逾下佳會不再期
茲遊偶來乍雞鳴起營營莫忘永清夜

游四明山

野人放浪山水情小弄雲海游四明半空下見日光動

中夜起聽天雞鳴松風濤卷出萬壑耳邊無處無秋聲
綠蘿碧澗月欲上澹煙遠岫天低橫山中招隱者誰子
相看擬和游仙行山川奇絕境復清秀色可攬難為名
安得仙人衛叔卿身騎白鹿下來迎粲然一笑白雲裏
授我寶訣教長生

虞姬

楚歌四面秋聲起美人如花帳中死重瞳將軍蓋世雄
淚流暗逐烏江水妾身妾身何足數八千健兒棄如土

空留恨血漬平原碧草無風為誰舞

王昭君

却手為琵琶推為琵琶馬上風裂宮中衣玉關將軍兵百萬
恨君枉殺丹青師穹廬夢斷悲笳曲淚眼朦朧漢宮燭
荒丘遺恨草離離猶帶千年土花綠

石門待謝雪坡不至

古戍人何在春程驛尚存驅雞啼上樹秣馬出前邨白
雨侵江郭青山對石門謝公游宿處清興與誰論

金方山先生集
卷七
桐廬舟行

自在眠沙鳥參差上瀨船
亂峰寒笛外疎雨暮鐘前
灘轉旋無路林深別有天
羊裘懷隱者高節已千年

錫山道中

風起晚淒淒愁雲墮漸低
近人山鬼泣當路竹雞啼
百里無煙火孤城只鼓鼙
故園楓樹外歸夢遶梁谿

送胡季城之官陽朔

桂林南望八千里陽朔郵程又在西
峒峒皆為玃狔住

山山惟有鷓鴣啼
天垂海國鄉關遠
雪壓江城草樹低
恨不從君拜虞舜
目窮閭闔意淒迷

得鄧南隱書時在廣西

風塵擾擾干戈際
兩地俱為淪落人
夢見亦憐風度好
書來翻遣別愁新
桄榔葉暗蠻溪雨
荔子花濃海嶠春
壯志幾回思奮迅
出門誰慰白頭親

題冷起敬山亭

石滑巖前雨茶香
樹杪風江山無限
景都在一亭中

畫梧石

鳴琴罷瑤席鶴夢清宵警涼月下前除照見梧桐影

送鄭希本還徽州

從親南國久為官話別江城歲欲闌三百灘聲流月色
青山多處是新安

張簡

二首

簡字仲簡吳人初師張伯雨為黃冠元季兵亂
以母老歸養遂返巾服洪武初召修元史有白

羊山樵集

顧仲瑛云仲簡詩澹雅有陶韋風
王子充云仲簡詩溫麗清深有類韋

柳

詩話饒介之分守吳中自號醉樵延諸文士作
歌仲簡詩擅場居首坐贈以黃金一餅高季迪
白金三斤楊孟載一鑑今
其詩載集中殊不見好

次韻張田秀才見寄

樹杪青蟲晴颺絲春城風物似年時
貧餘許邁餐金法閒有陶潛飲酒詩
芳草青青連野闊征鴻歷歷度江遲
長洲故苑煙花外千里懷人入夢思

游石湖治平寺用唐人許渾所題詩韻

湖上春雲挾雨來，楞伽山木盡低摧。
吳王廢冢花如雪，猶自吹香上舞臺。

貝瓊 四十二首

瓊字廷琚，一名闕，字廷臣，崇德人。洪武初徵修
元史，除國子助教，遷中都國子助教。有清江集。
詩話：姚文公燧為承旨時，一日玉堂宴，集聲妓
畢，奏有真真者，採南音，公疑而問之。泣對曰：妾
建寧人，西山之苗裔也。父司筦庫於濟寧，坐盜
用縣官錢，賣妾以償，遂流落倡家。公憫之，遣使

白丞相三寶努為落籍且謂翰林屬官王棣杖
華曰汝無妻以此姬配汝吾即其父也貲裝皆
出於公棣後官翰林待制廷琚為作真真曲以
紀事盛傳於時廷琚從學於楊廉夫其言曰立
言不在新絕刻峭而平行為可觀不在荒唐險
怪而豐腴為可樂蓋學於楊而不阿所好者也
其詩爽豁類汪朝宗整麗似劉伯溫圓秀勝林
子羽清空近袁景文風華亞高季迪朗淨過張
朱儀繁縟愈孫仲衍足以領袖一時此非鄉曲
之私天下之公言也

行路難

采玉于闐河問君勃律何時過采珠鮫人室問君百粵
何時出珠玉歲久同為塵君何重利不重身海有波缺

我楫山有石摧我輪行路難出門即羊腸何況萬里道
管叔危周公匡人仇魯叟尊有酒盤有壺鼓坎坎歌烏
烏海不可涉山不可徒路旁之人愛爾玉與珠行路難
我以為父安知非虎我以為兄安知非狼仰天悲歌泣
下霑裳

郊居

直木惡為輪疲馬思卷旆匡時既非才處約斯寡悔采
詩鑒興亡讀易明進退永懷嵇阮放甘與沮溺對

送潘時雍歸錢唐

海縣兵未息公子今何之酌君葡萄酒聽我白紵詞憶
昔來黃灣始為童子師連牀風雨夕秉燭聽新詩殷殷
金石聲真足解我頤同居石壁下斗柄倏三移脫略勢
利交所貴兩不疑久懷地主恩亦有尊鱸思東書向錢
唐磬折從此辭錢唐實都會西湖天下奇朱樓起相對
上有千蛾眉樓前五陵子並馬金鞭垂酒酣復張樂但
惜白日馳近者屬彫喪不及全盛時空山鳳皇去月黑

號狐貍春風吹行殿碧草生荒基何當從子游觀濤
鷗夷子實際時具飛騰方在茲匠石既已遇小大隨所
施從容宰相前奮舌論安危豈無一尺莖盜賊不足咎
天空羽毛急水涸舟楫遲臨岐更揮淚中年傷別離

答客

竊祿非本性適彼南山阿藜藿日不充慷慨獨商歌有
客向我言與世同其波商君震七國季子傾三河區區
守章句白首成蹉跎念之為三歎所樂良已多潛魚駭

釣餌飛鳥愁網羅結駟非不榮違己當如何

春日宴滄州

并序

歲在著雍涪灘春三月一日筠谷高士合賓客
序兄弟飲於滄州一曲平池湧翠高閣延青圓
景中天繁陰四合微飈遠激幽芳襲人清醪在
壺嘉肴既旅懲蟋蟀之刺儉美伐木之求友終
宴忘疲遷坐復酌鳴葭間發協朱鳳之相和舞
袖雙回翩驚鴻之欲舉嗚呼蘭亭金谷會豈能

常滄海流沙兵猶未息懟神仙之無驗宜曠達
以為高用綴新篇以紀雅集詩曰

天闊無留雲山明洗新黛過從屬休暇置酒滄州會柔
萋綠堪藉雜英紅尚在累觴既不辭秉燭還相對清彈
促哀響祕舞呈修態蘭亭今已矣金谷徒增慨大化會
有終四時寧復貸厭厭夜無歸從人譏倒載

早春

山寒花尚遲雪霽江已綠懷新感游子弄節喧衆族且

同尊俎樂幸免章綬束更擬登前峰青郊可遊目

擬東野

破屋夜通月霜氣刀稜稜病骨不受寒卒歲仍無繒殘
燈吐復翳僵卧如凍蠅事業漸蒸沙文章空鏤冰已失
國士意頗為少年陵長歌獨慷慨坐候東方升

四月十日兒子翔翻來鳳陽留一月遣歸因令早
營草堂及山下為止息之所

老病不得歸獨處長戚戚二子江南來眼暗初未識生

常戒垂堂肌肉如雪白一月常塗間海風吹盡黑買酒

為相勞問答向中夕迢迢漢陽簿春來斷消息阿宣在

母旁頗知工翰墨艱難且撥棄頓使沈憂釋所媿無定

居百歲半為客經營須及早尚愛龍湫僻况近讀書臺

雲銷四山碧泉深出丹砂地冷多琥珀既非匡世資庶

遂陶阮逸良辰戒僮僕息息又南北五月方鬱蒸日氣

成霞赤出入非所宜川陸慎所歷惜別豈無淚向汝難

再滴秋江有鱸魚當挂吳淞席

次韻鐵厓先生醉歌

先生愛酒稱酒仙清者為聖濁為賢清江三月百花合
江頭日坐流萍船左携張好右李娟紫檀雙鳳鷗雞絃
傾家買酒且為樂老婦勿憂無酒錢白日西沒天東旋
秋霜入鏡何當玄蓬萊有路不可到祖龍已腐三重泉
何如快飲三萬日酒樓即起糟丘邊願持北斗挹東海
月落枕股樓頭眠

穆陵行

并序

至元中西僧嘉木楊喇勒智利宋諸陵寶玉因倡妖
言惑主盡發攢宮之在會稽者斷理宗頂骨為
飲器璉敗歸內府九十年矣洪武二年正月詔
宣國公求之得於僧汝訥所乃命葬金陵聚寶
山石以表之予感而賦詩

六陵草沒迷東西冬青花落陵上泥黑龍斷首作飲器
風雨空山魂夜啼當時直恐金棺腐鑿石通泉下深錮
一聲白雁度江來寶氣竟逐妖僧去金屋猶思宮女侍

玉衣無復祠官護可憐持比月氏王寧飼烏鵲及狐兔
真人歎見起江東鐵馬九月踰崆峒百年枯骨却南返
雨花臺下開幽宮流螢夜飛石虎殿江頭白塢今不見
人間萬事安可知杜宇聲中淚如霰

己酉清明

白苧衣鮮紫騮馬清明酌酒梨花下馬蹄一去不復來
梨花又見清明開城南城北多新墓日落啼鴉滿高樹
有酒誰澆千歲魂子孫盡發濠州住主人更勸金叵羅

阿蠻起舞玲瓏歌生前不飲君如何

予避地千金圩屢游及史兩山酒酣興發賦詩一首惜山中無賞音者姑錄以自娛云

神人夜割蓬萊股蒼然尚作青獅舞及基得道此飛騰
煙火千家自成塢前年盜起官軍下存者如星纔四五
我來欲置讀書牀出入未愁穿猛虎山寒月黑無人聲
夾道長松作風雨佩環何日歸公主泉下銅棺閔千古
石仆麒麟罷官守林宿鴟鴞聞鬼語苦耽勝槩惜殘年

共說當時悲老父錦繡池臺已零落田翁八十鉏新土
傷哉土俗如巫覡伏臘荒祠沸簫鼓祠旁鑿井深不枯
雲氣隨龍有時吐試上崔嵬望沃洲直將培塿齊天姥
春前野桃渾欲放雪盡黃精亦堪煮興來起挾李長庚
重賦琵琶雙玉女

郭忠恕出峽圖

巫峽何危哉夾拱如龍門禹治九州不得到此峽口水
作雷霆奔問汝江中人幾日三巴去我眉五月銷古雪

灩澦堆深虎須怒巫峽之險安可攀胡為吳檣楚柁日
日來往乎其間高堂中有如花顏銀屏翠箔青春間涉
此萬里道經年猶未還黃金不買死直欲高南山汝舟
非龍汝非虎鼉鼉出沒饒蛟舞前者已脫後者號江神
無情天又雨石巉巖兮利刃攢一葉宛轉行千盤覩此
魂魄悸豈待杜宇夜叫猿聲酸安得鑿之盡平土萬古
不識風波苦

送進士霖歸天台

赤城雲氣神仙家千樹萬樹蟠桃花十二樓臺起花外
石門水長通烏麻當時劉郎亦草草出山却憶山中好
莫信丹丘日月長玉人已共桃花老山空水流雲自飛
劉郎看花須早歸

題董源寒林重汀圖

天下畫師無董源學者紛紛工水石雲山萬里出巴陵
白首淮南見真蹟亂石平坡淨無土松根裂石蟠龍虎
偃蓋千年飽雪霜林深六月藏風雨江上邨墟何處入

浮空遠黛蛾眉溼漁人日暮各已歸小舟如鳬落潮急
我昔西清常看畫南唐此本千金價坐移絕境在雲間
月出霜後啼後夜薄游未挂吳淞帆令我一夕思江南
安得買田築室幽絕境開窗日日分晴嵐

十月十三日過梧桐溼時官籍濮彥宅龐氏唐氏
自經感而賦之

天寒水清石齒齒杏葉初黃豆花紫舞榭歌臺不見人
頭白烏啼月明裏當時豪俠輕五侯一榮一枯八十秋

綠珠亦解死金谷草露作淚無時流

冬夜

歲月悲游子風塵老腐儒
兵交連北冀客隱向東吳
草白秦皇道天清陸瑁湖
昔時尋樂處撫事一長吁

排悶

白首尚為客飄飄天一涯
耳鳴通夜雨眼暗隔年花
畏酒從今斷題詩浪自誇
有邨如栗里準擬便移家

夜泊武塘

風帆如健馬一日過嘉興水鳥如相喚秋蚊尚可憎照
人明月近接地白河澄耿耿渾無寐中宵對玉繩

橫港

南行入橫港茅屋到林丘落日猶斜照寒潮忽倒流牛
羊平野散鵝鴨小溪浮喜見平生友籬邊一繫舟

除日守歲

守歲西清第幽懷強自寬極慚公子意須盡老夫懽明
日王春始踈星客夜闌殷勤一杯酒到手莫辭乾

晚眺

極目三邊靜傷心萬室空
斷山明落日飛藿卷回風
漢節無歸使夷歌有野童
煙塵幾時息歸釣古城東

送胡鼎文同知赴安州

別駕安州去青天蜀道危
近辭丹鳳闕遠過碧雞祠
暮雨歸神女春風怨子規
宦游多好思重和杜陵詩

壬子冬至日過來青堂示勉中祖南二友

衣冠且從俗猶有晉風流
我愛陶貞白人稱馬少游
蜂

房寒未割雞柵暖宜修不必論三仕何如號四休

送王克讓員外赴陝西

貂裘萬里獨衝寒舊是含香漢署官白雪作花人面落
青山如鳳馬頭看關中相國資王猛海內蒼生望謝安
應念東南有遺佚采芝深谷尚盤桓

十月聞雷

天氣初寒春尚賒坎中夜半有鳴蛙百年宇宙喧戎馬
十月雷霆起蟄蛇老柳黃垂霜後樹小桃紅破雨中花

三公變理非無術愁聽空江度鬼車

清明日陪楊鐵厓飲城東門是日風雨

盪舟撾鼓出東門怪雨盲風野色昏
海上一春猶作客樓頭三日共開尊
青山石馬新人家錦樹黃鸝舊相園
快意百年須痛飲轉頭何處不銷魂

即事

少海旌旗落照中沙陀兵馬雁門雄
朝宗久廢諸侯禮翊戴方尊節度功
今日豈宜求騎劫當年應失倚全忠

丹書鐵券存終始萬古山河帶礪同

經故內

山中玉殿盡蒼苔天子蒙塵豈復回地脈不從滄海斷
潮聲猶上浙東來百年禁樹知誰惜三月宮花尚自開
此日登臨解題賦白頭庾信不勝哀

雨中書懷

漢苑秦宮跡已陳金沙一簇為誰新山河有恨空懷古
風雨無情只送春南國鷓鴣愁北客東家胡蝶過西鄰

尊前莫唱昇平曲白髮秋娘也自顰

秋思

兩河兵合盡紅巾豈有桃源可避秦馬上短衣多楚客
城中高髻半淮人荷翻太液非前日花落蕃禧又暮春
莫上高樓望西北遠山猶學捧心顰

庚戌九日是日聞蟬

今日出門風雨收東山西山須可遊那能束帶從王事
且復開尊破客愁雁別紫臺初避雪蟬鳴紅樹不知秋

桃花細雨應相笑歲月無情自白頭

送楊九思赴廣西都尉經歷

邛笮康居路盡通西南開鎮兩江雄漢家大將推揚僕
蠻府參軍見郝隆象跡滿山雲氣白雞聲千戶日車紅
明珠薏苡無人辨行李歸來莫厭窮

過泐李潭長老三塔院飲於志遠宅賦詩

城南看花花正開清明微雨灑塵埃路從周處臺前過
山轉曹彬廟下來墮地遊絲輕復起近人嬌燕去仍回

高歌擊節狂懽賞共盡生春酒一杯

父山隱居夏日

病客從教嬾出邨
兩山一月雨昏昏
野花作雪都辭樹
溪水如雲忽到門
無復元戎喧鼓吹
試從田父牧雞豚
來青處士時相過
猶是平原舊子孫

懷內弟陸熙之

我別語兒溪上宅
月當二十四迴新
如何故國尚戎馬
即恐比鄰非昔人
簫鼓誰家猶作社
樓臺廢苑不成春

夜闌憶爾無由見，悵望黃姑析木津。

秋興和方文敏

一日龍飛濠泗間，橐駝牛馬走冥顏。
已來肅慎通滄海，更却呼韓閉玉關。
使者旌旗分道出，將軍部曲凱歌還。
白頭野老知何事，紫氣長瞻萬歲山。

送馬伯溫之廣西

樓船搥鼓發江中，昨夜檣烏喜北風。
可惜春歸還送客，何知別後已成翁。
浮天雪浪三湘闊，到海雲山百粵通。

有子漢陽專簿領一緘千里託飛鴻

遣興

我住雲間今四秋恰如杜甫在秦州賦詩黃耳冢前去
打鼓白龍潭上游暮景飛騰如過翼此身浩蕩一虛舟
黃塵紫陌繞車蓋且伴老翁隨海鷗

讀胡笳曲

日年已到甲辰終休倚山河百二雄八駿何勞巡海上
一龍今見起江東專門學士空談道仗鉞將軍競策功

忍聽蘆花舊時曲此身飄泊歎秋蓬

黃灣述懷二十二韻寄錢思復

海岱初雲擾荆蠻遂土崩王公甘久辱奴僕盡同升
遠適將妻子端居謝友朋草堂森苦竹瓜圃蔓寒藤
地盡山光斷天昏海氣蒸夜深常畏虎秋後更多蠅
鶴髮愁難理烏皮嬾自凭娉婷羞不薦齷齪怯先登
拔劍歌誰和聞茄寢復興過逢欣已絕疾病恨相仍
自擬秦民去重煩魯使徵吹毛多見摘刺舌尚須懲
耆老惟君在文

章對客矜才全懷白璧道重比朱繩虎榜名非忝雞林
價盡增極知童子陋深愧大巫稱最憶春停騎高談夜
翦燈病駒終棄擲生鶻必飛騰跡已從信屈時多任愛
憎賦詩閒莫廢好事老猶能漢月今頻滿天河本自澄
山陰有孤櫂雪下興還乘

壬子夏端居二湖與二三子讀書而苦熱如焚一
坐四遷杜少陵發狂大叫非過言也回思雲間時
往來呂邵二族其地有林藪之美池臺之勝可以

避暑而游士寓公咸會於此相與窮日夜為樂及
兵變之後所至成墟海內忘形半為異物感哀榮
之無定悼生死之相違遂成三十四韻

地僻從吾放山深少客過昏昏蒸酷暑鬱鬱抱沈疴斷
酒愁為敵拋書睡作魔雲生空望雨水涸不通河唱和

聞蛙吹遨遊記鶴坡輞川移絕境瀑布激懸波數子論

新好諸翁樂太和百篇齊屈賈楊鐵厓五字逼陰何鄭本初

共哂佯狂徹魯道原焉知好辯軻馬文壁冰壺清莫比夏景淵

鐵硯老猶磨

呂德厚

公子時同載

夏士文

將軍夜不訶

鄒寶谷

結交真有道

倪菊存

與物總無他

倪耕間

每喜方舟坐何煩

信馬馱秋風千戶竹宿露半池荷席睹藏鉤令亭邀竊

藥娥

有賓月亭

頗黎行凍蟻瑪瑙進寒鼉潦倒衣從溼敲傾

弁或俄羌人能感粟漢女善顰婆對舞翻朱袖羣謳飲

翠蛾紛紛方大噓浩浩漸微酤壺中恒三馬詩成愧一

螺如何棄俎豆却復老干戈落雁長淮遠蜚鴻大野多

死生俱異域出處不同科淚泣荆人玉腸迴織女梭祗

憐成骯髒及此歎蹉跎室已如懸磬門今信設羅凌霄
榮小草平地引危柯水鳥浮沈戲林蟬斷續歌分甘留
白屋身免束青縞晚牧幽湖上春耕曲澗阿丹砂尋舊
井金刹過祇陀豈復同般樂應知廢切磋茫然感平昔
興發強吟哦

殷弼一首

弼字里未詳與修元史

望海

吳淞江口海門東萬里京師咫尺通
白柁紅旗三月浪
紫簫花鼓午潮風

明詩綜卷七

謹案卷六第三十頁前六行都爾蘇舊作都實今
改 前八行鄂端諾爾舊作火敦腦兒今改

卷七第十三頁前一行三寶努舊作三寶奴今改
十七頁後一行嘉木楊喇勒智舊作楊璉真加
今改

[illegible]

總校官庶吉士臣張能照
校對官編修臣閔惇大

謄錄監生臣吳魯田

謄錄監生臣楊仁基